

حكاوي ستي

سلسلة قصصية من التراث الشعبي الفلسطيني

نبيل العريني

السلسلة الأولى



دار الرمال

الطبعة الأولى ٢٠٢٠

تصنيف الكتاب: مجموعة قصصية

في التراث الشعبي الفلسطيني

دار الرمال

قبرص

www.rimalbooks.com

ISBN 978-9963-715-34-3

لوحة الغلاف للفنان التشكيلي عماد أبو شتية

تم اتخاذ كل العناية لتتبع أصحاب حقوق الطبع والنشر. ومع ذلك، إذا كانت هناك عمليات حذف غير مقصودة، فنحن نعتذر، وسنسعى، إذا علمنا، إلى تصحيح ذلك في أي إصدار لاحق.

ملاحظة مهمة ومستمرة

عليك/ك تبديل حرف الكاف بحرف القاف في معظم الكلمات التي لا تستطيع/ي فهم معناها.

المحتويات

المقدمة	٥
إهداء	٧
بوح أب	٨
لهجة وخراف	٩
القدس	١١
ثوب فلاحي	١٥
زيت طفاح	١٨
قباقيب وشواريح	٢٠
قطعة الخوفة	٢٤
فايضة	٣٠
عزومة مركبية	٣٥
الضرة مُرّة ولو كانت جرة	٤١
بعونا العرب بيع	٤٧
بتعرفش مرتك إلا لما إيدك تقصر	٥٥
ابن العذرة!	٥٨
جبنا لكرع يونسنا، شلح طكيتو وخوفنا	٦٢
مسخن فلسطيني	٦٥
يا الله زمان كنا محلانا في بعض	٧١

إلي بيع سروالو اليوم.. بيع شرفو وأرضو بكرة... ..	٧٤
يا الله كنا ما أكو سنا بالكبار زمان... ..	٧٧
انتفاضة ١٩٨٧	٨٠
حب على الطريقة الفلسطينية	٨٣
العبور	٨٧
بدنا نرجع يا ستي	٩٠
بلدة بينا	٩٣
بلدة بيت طيما	١٠١
قرية الجورة	١٠٦
قرى بطاني شرقي وغربي	١١٣
قرية جولس العسقلانية	١١٨
قرية المسمية	١٢٣
بئر السبع	١٢٧
قرية عاقر	١٣٣
قرى السوافير	١٣٩
قرى صرفند العمار - والخراب	١٤٣
المخيم	١٥٠
المصادر	١٥٦
أراء القراء	١٥٧

المقدمة

بسم الله الرحمن الرحيم

والصلاة والسلام على أفضل الخلق والمرسلين محمد بن عبد الله النبي الأمين

ثم أما بعد،

إنه ليغمرنى منة أن أكتب مقدمة هذه السلسلة، راجية التوفيق للفكرة التي جاءت بها. ففي المرة الأولى التي أرسل لي الأستاذ نبيل إحدى قصص سلسلة «حكاوي ستي»، التي هي بين أيديكم اليوم، استثار حفيظتي أن يكون «الفيس بوك» هو المثنوى الأخير لها، بالإضافة إلى تداولها من أشخاص لا يعلمون مدى قدسيتها، وها هي بفضل الله تبصر النور لتصبح وثيقة تاريخية، سلسلة على الذاكرة، عصية على النسيان، فهذه الصفحات العابقة بتاريخ قرانا الفلسطينية المهجرة، ستجعل القارئ يندمج بين المعنى اللفظي والمعنوي، بينما كان سيصعب عليه حفظ ما جاء فيها لو قرأها من كتب تاريخية رسمية أو منهجية، مما يجعلها تنغرس في ذاكرته حتى تصبح جزءاً منها.

تعتمد كاتبنا السرد بالعامية الفلسطينية، والتوغل ببعض مصطلحاتها الخاصة بالشعب الفلسطيني بشكل حصري، وبصورة محفوفة بالفضول الذي يحفز القارئ لتشريح الكلمة ليكتمل فهمه للمعنى، وبذلك أصاب كاتبنا عمق هدفين: الأول أن يصل القارئ إلى حد الانسجام الروحي في الأحداث، أما الهدف الثاني فهو ترويض ثقافة المصطلحات الفلسطينية التي لا تعيها الأجيال الحالية بعد أن أصبحوا يدمجون اللغات الأجنبية في أحاديثهم.

عندما يبحر الكاتب في عمق الكلمات تصبح روحه رافداً لمداد قلمه، فيسيل

بانسيابية تنقش صوراً ذهنيّةً يستشعرها القارئ كأنه يعيشها بذات اللحظة، وعندما يكون الوحي هو الذاكرة العتيدة التي تعج بعقب الأزمان الغابرة ينصب الخيال كشلال يتدفق بالعبارات الدقيقة، فتجسد الأحداث بالصوت والصورة في حالة مجازية تكاد تصل حد الحقيقة. بهذه الوتيرة المطردة اندفع شراع كاتبنا نحو توثيق تاريخي يغازل الحروف فترقص واثقة في منحنيات الفكر فينجذب إليها لحن الخلود لتبقى في كينونة لا تنسى.

كل أمنيات التوفيق لكاتبنا الذي اخترق قلمه عثم حصار غزة الحبيبة لنشر النور، وأتمنى له المزيد من التقدم وإحراز نجاحات أدبية يفخر بها الشعب الفلسطيني كهوية ثقافية مشرقة أمام الشعوب رغم كل ما يعصف بوطننا الحبيب.

منى الصرفندي
رام الله

إهداء

إلى روح ستي أم أمي رحمها الله، الحاجة الفاضلة، المكافحة، الصامدة، المربية الصابرة، «جازيه علي أبو شاربين»، أم وحيد، من بلدة زرنوقة، قضاء الرملة، وإلى روح أمها ستي وست أمي، رحمها الله، الجميلة، اللطيفة، الظريفة، الكريمة، الحاجة المرحمة «سلمة آل المثناني» أم حسن، من بلدة قلنسوة، المثلث، وإلى روح ستي أم أبي رحمها الله، العظيمة، الطويلة، المثابرة، مربية الرجال وحبوبة الصغار، الحاجة «خضرة قشطه» أم عمر، من بلدة زرنوقة، قضاء الرملة، وإلى أمي الطيبة، المكافحة، المجاهدة في هذه الحياة، المساعدة لي في كل حلقة من حلقات «سلسلة حكاوي ستي» الجزء الأول، الحاجة «أم أحمد العريني» من بلدة زرنوقة، قضاء الرملة، وإلى زوجتي الحبيبة وبناتي بيسان وجنين، اللواتي حفزني ودفعنني للكتابة عن بلداتنا وقرانا الأصلية بعد رحلة الدهشة والأسئلة المتكررة عن قضيتنا الفلسطينية. وإلى صديقي الجميل «رامز رضوان الحانوتي» الذي سهر معي الليالي في تجهيز هذه السلسلة، وإلى الأصدقاء في العالم الأزرق «الفيس بوك» الذين شجعوني خير تشجيع، وإلى المشتاقين لأغصان المرمرية وعروق الزعتر، إخوتنا الفلسطينيين في المهجر، أهدي هذا العمل التراثي المتواضع لهم جميعاً.

بوح أب...

إن الدافع الحقيقي والأول وراء كتابتي لسلسلة حكاوي ستي كان دهشة بناقي اللواتي خلقن في الهجرة واللجوء من أبوين لاجئين، وجدود مهاجرين، وأقارب مشتمين في أنحاء هذا العالم. الحاجة إلى الأرض والسماء والماء اللواتي ينتمين إليها جعلتهن يسألن عن وطن ضاع منذ أكثر من سبعة عقود، في ماضٍ لا يستطيع أي فلسطيني أن ينساه. وأنا بصفتي أب كان علي الإجابة عن الكثير من الأسئلة، إذ يجب علينا غرس أجوبتها في أطفالنا، ووجدت إن «حكاوي ستي» سوف تسعفني بالإجابة عن هذا الكم الهائل من الأسئلة، فوفقني الله في كتابة السلسلة الأولى التي شملت الكثير من العادات والتقاليد والبلدات والقرى الفلسطينية بطريقة طريفة وبلهجتنا الفلسطينية.

نبيل محمد العريني
بلدة زرنوقة



لهجة وخراف^١

- ستي ليش بضلك تحكي عن القاف كاف؟
مع إنك مرات بتحكي زينا قاف!

- هاض يستي أنا والله مخربطة^٢ منا عارفة أركز
خطرة^٣ بحكي زيكو..

وخطرة بلاقي حالي غير حائه لأمي.

مهني أمني كلنسوية^٤ يستي بכולوا عن القاف كاف...

وكل الخرفات^٥ إللي حدّاي^٦ أخذتها عن أمني.

ولازم يستي تكون عارف،

لكل كرية بالبلاد في إلها لهجة وخراف..

١	كلام
٢	غير متأكدة ناسية
٣	مرة
٤	قلنسوة بلدة فلسطينية في المثلث
٥	الحكايات
٦	التي أعرفها

عندك على سبيل المثل:

أهل المجدل ونعليا وجباليا البلد وبيت لاهيا وسدود وبربرة والجورة وأهل
خصاص^١

بكولو عن الكاف شاف...

متضحكش هاض خراف أهل فلسطين..

تستعرش^٢ منو يستي، هذي حاجة لا بتعر ولا بتوطي الرأس.

هذولي بذل ميكلولك كيف حالك؟ بكلولك شيف حالك؟

كان أبوي الله يرحمه يمول عنهم

هذول أهل الكشكشة^٣ ولّا التشتشة^٤...

الله ما يعيني عالزلال^٥.

وكانوا يستي أهل البادية، يعني البدو تعين السبع^٦

وصحرة النكب^٧ يكولو عن حرف العين نون.

بدل ميكلك أعطي يكلك أنطي.

أبوي كان يفهم عليهم منيح.

وأبوك اشتغل معهم وكان ينكلهم بالطرميل^٨ عالعریش.

وكثير يستي على هالمنوال^٩.

لو بدك ادكك بخربطك خربطة^{١٠}...

١ مدن فلسطينية قريبة على بعضها تتحدث نفس اللهجة

٢ تستحي أو تخجل

٣ يكشكشون الكلام بحرف الشين

٤ يتشتشون الكلام بحرف الشين

٥ على الافتراء

٦ مدينة جنوب شرق فلسطين

٧ الصحراء الشرقية لفلسطين

٨ الشاحنة

٩ على هذا الحال

١٠ أجعلك في حيرة من الفهم



القدس

- ستي عمرك مزورقي^١ القدس؟

- آآه يستي تشلعليش^٢ كلبى ولا يستي!
زورت الكدس، والمسجد المرواني أبو كبة ذهبية
والمسجد الأكصى، مطاول طول..
الكدس يستي إلها خمسطعشر^٣ باب..
عشرة مفتوحة وخمسة مسكرات.
ليش ولك إنت بتنسى؟

١	ذهبت إلى
٢	لا تمزع
٣	خمسة عشر

بتنسى لما كنت أجيبك معي زبيب^١
وحلاوة كرعية^٢، ووزع عليكو؟
إنت بالذات يا أكال يا نكار...
جبتلك كميرا بتقلبها بطلعك فيها صور!
ناسي كنت تكول فها عفريت..
ولإخواتك كنت أجيب معي إلهن طבלات جلد.
وزرت مكام النبي صالح إالي بالرملة^٣
والمسجد الإبراهيمي تبع سيدنا إبراهيم،
عليه وعلى نبينا السلام،
هضاك بالخليل «خليل الرحمن»^٤
وكبر سيدنا يوسف بنابلس^٥
وبير سيدنا يوسف كمان إالي بكريّة سنجل^٦
وجامع العجمي تبع اليفوية هضاك بيافا^٧
وصلينا بجامع حسن بيك^٨ بيطل على بحر يافا
والله لفلفت^٩ أنا يستي...
وزرتلك^{١٠} كمان مكام الخضر إالي بدير الأسد^{١١}

١	عنب مجفف
٢	حلوى تصنع من لب نبات القرع الأصفر
٣	مدينة فلسطينية
٤	مدينة فلسطينية
٥	مدينة فلسطينية
٦	مدينة فلسطينية
٧	مدينة فلسطينية ساحلية ومسجد تاريخي
٨	مسجد من العهد العثماني
٩	تحركت كثير
١٠	زرت زيارة
١١	قرية شمال فلسطين وموقع تاريخي
١٢	

هاض بشمال حيفا^١، وجامع الجزار يلي بعكا^٢.
 محلاهم هالعكوية سوادهم سواد البين وكلوبهم بيضة..
 ورحت على عسكلان^٣ الكديمة يللي هي كرية الجورة^٤،
 إلها هالعمدان الرخام طالعات من الجرف زرك زرك،
 وزرتلك ضريح الباب^٥
 يلي بحيفا، وهالجناين بشرحن الكلب
 فوك فوك بهالجبال البيض
 بكلولهن جبال الكرمل،
 وإحنا بالنبي صالح بالرملة
 مركنا عالمسجد الأبيض كمان^٦
 وهالبوابير^٧ بزرنوكة^٨،
 هان وهان زي مدشرناهن لونهن مهو متغير.

- بوابير إيش يستي؟

- بوابير المية يستي إالي كنا نزي فيهن بيراتنا^٩..
 ورحنا كمان على عين العذرة بالناصر^{١٠}...

-
- | | |
|----|--|
| ١ | مدينة فلسطينية ساحلية ومقام تاريخي |
| ٢ | مدينة فلسطينية ساحلية ومسجد تاريخي |
| ٣ | مدينة فلسطينية ساحلية |
| ٤ | قرية فلسطينية شمال غزة |
| ٥ | موقع تاريخي |
| ٦ | مسجد تاريخي |
| ٧ | ماكينة ماء قديمة |
| ٨ | قرية فلسطينية، قرية الكاتب |
| ٩ | حقول الأشجار الكبيرة |
| ١٠ | مدينة فلسطينية في الشمال، وموقع تاريخي مسيحي |

والله لفلفنا يستي تْكُلنا بس، كنا نروح عالكدس بعشرة شيكل
من ساحة غزة، مش زي اليوم بدك تنسيك 'وغراب بين...



ثوب فلاحى

- محلاه الثوب يا ستي!
هاض مختلف عن الثاني.

- هاض الثوب يستي كِصتو كِصة.
كانلي رفيكة من بيت دجن^١ وجبتلي إياه.
هاض ثوب دجني^٢ يستي، مكلم تكليم،
بتلاكيه من تحت مصفوف صف
ومن فوك مسبل تسبيل.
وفي ثوب مجدلاني هضاك، مجدل تجديل^٣،
وفي كماني ثوب مسبع بتلكيه كلو سبعات،

١ قرية فلسطينية

٢ يتبع لقرية بيت دجن

٣ يتبع لمدينة المجدل

هضاك تبغ بير السبع^١ يستي.
العرايس بلبسنو أحمر والأرامل بلبسنو أزرك،
وإذا الوحدة تجوزت آخرة مرة^٢ بطرزو بالورد،
وبكونلو برقع^٣ مبرقع الوجه بركة.
وفي ثوب رحاوي^٤ بكونلو ثمن ذراع
ومثنى طبكات.. طبكات وإلو بورنص^٥ أحمر.
وفي كمان يستي ثوب تلحمي^٦، بسموه ثوب الملكة
بكونلو عالصدر زركشة^٧ اسمها تلحمية، وإله كصبة،
وبكونلو بنايك^٨ عحفافو وعليهن مطرزة مشربية،
وبلبسن عليه جكيتة التلحميات ليبينن ملكات.
أما شو بدي أكلك عالثوب المكدي^٩؟
هضاك أحلا ثوب! إسمو ثوب الملس^{١٠}،
عالصدر بتلاكيلك كبة كنعان^{١١}،
وعالحفاف مصلب تصليب^{١٢}،
وبتلاكي فيه هلال وآيات كران^{١٣}.

-
- | | |
|----|--|
| ١ | يتبع لمدينة بئر السبع جنوب شرق فلسطين |
| ٢ | مرة ثانية |
| ٣ | غطاء على الوجه يشبه النقاب لكنه مخرم |
| ٤ | تابع لأقدم مدن العالم الأثرية في فلسطين، أريحا |
| ٥ | غطاء رأس يشبه الطربوش بشكل مخروطي |
| ٦ | يتبع لمدينة بيت لحم التي تحتضن كنيسة المهد |
| ٧ | رسمه مطرزة |
| ٨ | أطراف |
| ٩ | تابع لمدينة القدس |
| ١٠ | الناعم |
| ١١ | قبة المسجد المرواني |
| ١٢ | كناية عن الديانة المسيحية |
| ١٣ | كناية عن الديانة الإسلامية |
| ١٦ | |

الله يعطيني طولت العمر وألبسك أحلا ثوب
بعرسك يستي...



زيت طفاح^١

- هات يستي نولني كنيئة الزيت
منعن^٢ الثلاجة..

اسكيلى هان.. هان عصحن البصرة^٣.
إخص^٤ على هالطعم!! هاض زيت!!
يكطع المصانع وزيتها!

والله ريحتو ريحت مكايين!
ااااا سكالله عيام زمان يستي..
كنا نسوي زيتنا بديننا..
كانو يكلولو عنو زيت طفاح...

١ احد أنواع طرق عصر الزيت في فلسطين

٢ من فوق

٣ طبخة فلسطينية شعبية من الملوخية الناشفة

٤ كلمة تستخدم لللعن

كنا إنَّكي^١ هالزتونات
 من تحت الشجر السكايط^٢،
 وننكعهم^٣ بميت مطر ليلة كاملة،
 وعوجه الضو نهرسهن^٤ بالزلط،
 ونمعصهن^٥ معص يمك.
 وبعدين كانت أمي تشعلك هالنار،
 لحد متغلي، وتدبهن فيها، وبعدين تصفيهن،
 ونعملهن حواش^٦ للنار أخره مرة،
 وتلاكي الملية زيتها طاش^٧ وطفح فوك.
 وبس تبرد الملية نصير نوخذ الزيت
 من عوجها ونغب^٨ فيه غب.
 أما شو ريحتو يستي!!!
 ريحت لبلاد، مش ريحت مكايين..
 سكالله عزيت زماآآن... سكالله...

١	نجمع
٢	الواقعات
٣	النقع في الماء
٤	نقوم بدقهن
٥	نقوم بفحصهن
٦	وقود من عجم الزيتون
٧	صعد الى أعلى الماء
٨	نأخذ بهمة



قباقيب^١ وشواريخ^٢

- إيش هالجزمة إيلي بتبرك برك يستي
وين متزبط^٣ ورايح؟

- والله يستي اليوم فرح صاحبي،
بشار الخالدي، ولازم نلبس ونتلبس،
الزفة عند رامز الحانوتي.

- كدیش حکها هالکندرة؟

-
- ١ حذاء يصنع نعله من الخشب وأعلاه من الجلد أو الكوشوك
 - ٢ حذاء كان يستخدم ما قبل القباقيب ويصنع كله من الكوشوك الذي كان يأخذ من إطارات المركبات
 - ٣ أنيق

- حقها تسألش يستي!
متين وخمسين شيكل^١.
هذي بك فير^٢ Bak fyar أصلية.

- الله يرحم جدك أبو أحمد،
كان يلبس من هالشوار يخ بليرتين..

- إيش هذي الشوار يخ أول مرة أسمع فيها؟

- هذي يستي كوشوك جلد،
كانوا يجبوهم من معسكرات لانكليز،
كبل لخياطة والصناعة،
وكبل متعرف الناس الشباشب^٣.
مكانوش يلبسوا غير كباك وشوار يخ.
الكباك بكون من الخشب،
وعليه هلاله كوشوك مدكوكه بمسامير،
والشور يخ كوشوك بكوشوك،
مدكوك بمسامير، وإلو حبكة بتنكوي كوي..
وكان في واحد حدانا ممدينة اللد
إسمو أبو حسين لسكافي،
سكافي هذي شغلت إالي بسوي وبصلح الجزم،
وبصنع الكباك والشوار يخ.

١ عملة إسرائيلية

٢ إسم ماركة حذاء يصنع في مدينة الخليل

٣ حذاء المنزل

مكانوش ثنين ثلاثة بكل البلدة،
إلي لبسين جزم.. تلاكي المختار
وكبرية البلد بس إلي لبسينهن.
الجزم مفصلة على كدهم..
اليوم بشوف صاروا يطبخوا الجزمة طبخ،
تطلع مزبطة.
وتنو لسكافي ييجي يفصلك شروخك
عكد رجلك. يكيسوا بالكمحة،
بالكمح البلدي أبو زعموط،
تيعرف فمرة رجلك.

- يقيس رجلي بالقمحة! كيف يعني؟
هي القمحة كاينة أداة قياس؟

- أنا عارفة إيش بتخریط بتكول إنت...
الحاصلو^٢، كان لسكافي يحط كدم رجلك
من الأصابع للكعب على كوشوكة، ويرص^٣
حولها من أصبعك لكبير لورا،
يلفها لف لأصبعك لصغير،
ويرص حولين رجلك الكمحات.
يعدلك أربعين كمحة..
واحد وأربعين عكد متطلع...

١ شكل حبات القمح الطويلة

٢ الذي حدث

٣ ينظم

ويكلك مكاس رجلك هالكد.
إحنا يستي من وكتيش
عرفنا لبلاستك والحديد؟
تنها تحضرت الناس وتمدنت!
أوليتها كلشي كان من الكوشوك.
الْكُفّ^١ إلي بدلوهن اليوم بالجرادل..
مطيلع النخل^٢، لبشكنات^٣
كلو كان كوشوك.
والله يستي إنهن أحزك^٤،
وأكوى من تبعات اليوم.
وهاالخالدي هاض من أنهي بلد؟

- كراتية^٥ يستي..
والحنوتي من بيت دجن^٦.

- عرفاهم الحنوتية ستو صحبتي كانت..
هاذي إلي گلتلك عنها أعطني الثوب الدجني نسيت!!!

-
- | | |
|---|---------------------------------|
| ١ | وعاء جلدي لحمل الأشياء |
| ٢ | حبال للصعود على أشجار النخيل |
| ٣ | الأشياء التي يستخدموها بالفلاحة |
| ٤ | أقوى وأشد |
| ٥ | قرية فلسطينية |
| ٦ | قرية فلسطينية |



قطعة الخوفة^١

- مالك يستي هزلان^٢ وتعبان هيكاً؟

- والله يستي منا عارف؟

مبارح كنت قاعد عباب المكتب
والكهرباء قاطعة..

إجا ولد صغير يقطع الشارع..

وإجت حنيّتها^٣ سيارة بدها تدهسو...

ومن حنيّتها وأنا حاسس رجليه توجعني..

وحاسس حالي هزيل.

١ طريقة شعبية فلسطينية للتعامل مع خوف الكبار والصغار إثر الصدمات من الأشياء التي تخيفهم، بتدليك عروق الأرجل والأيدي

٢ تعبّان مرهق

٣ أثناء

قلبي وقع برجله وحسيت رجله فزين.

- أهاااااااااا يستي بدك كطع خوفا على هيك.
الله يكودلها^١ إمّو، وين كاينة عنو..
تنها مدسراه^٢ بالشارع.

- إنتي على طول الله يكودلها إمّو؟
والله فلت^٣ من إيدها فلت.

- تنزعجش يستي، لأ، لزلام بتخاف.
إلي بخافش بخوفش
هلحنؑ مخرجؑ،

وبتكوم زي لحصان تفتط فط.
هات كنينت الزيت منعن الثلاجة،
وتمدد هان... هان
لازم زيت زيتون بلدي..
بنفesch زيت غيرو يستي.
كطعة الخوفة يستي زي هيك..
مد إيدك بنمرجلك بطن لكواع.
شاف.. شاف معركات تعرك^١..

١	يكيد لها مكيدة فتنة يفتنها بها
٢	تركته
٣	رغم عنها
٤	ألان
٥	أدلكك
٦	معقدات عقد

زي العكد معكدات.
 بعدينش^١ إرفع كميصك،
 من تم المعدة بنمرج لتحت،
 سحب هيك من هان لهان،
 تنك بتسحب البطن سحب.
 بعدينش من هان..
 تخفش من فوك لفوك.
 أنا عارفة بتتوجع هيهن زي البلحات^٢.
 شايف... شايف؟
 هلحين ناملي على بطنك..
 لازم بطن الركب يتمرجن كمان.
 ايون والله يستي معكدات تعكد،
 كيف كاين قمشي يمسخمط^٣.
 هدهنه^٤، عكد بنمسكن بالإيد..
 هذول بكطعن الخلف^٥.
 تحمّل يستي، كركط^٦ سنانك بالوسادة كركطة،
 هذول بنسحب سحب..
 لعنديت^٧ رمانة الرجل.

-
- | | |
|---|--|
| ١ | بعد هذه المرحلة |
| ٢ | في منطقة العانة تكون هناك عقدتين تشبه البلحات |
| ٣ | تقال للشخص المسكين وهي من مسخوط سخط أي انه فقير أو مسكين |
| ٤ | وجدناهن هنا |
| ٥ | يعتقد في فلسطين ان التأخر في إنجاب الأطفال من الرجال سببه الخوف، والعقد التي تكون في الأقدام |
| ٦ | تمسك بقوة |
| ٧ | إلى مكان معين |

خلصنا.. خليك متمدد تسويلك^١ عروك الوثاب^٢.

هذول عركين يستي..

واحد يمين الظهر فوك

هذهو، واحد عشمالو كبال بعضهن..

شايف كيف منفوخ نفخ.

هذنا خلصت كوم أكعد كعاد.

كُلت صواريخ نزلت علينا،

على غزة، تنها عركبتنا.

مضلش غير عصعوصة للإصبع لكبير بإيديك^٣،

هذول بدهن زلمنه، تحمّل لشوف،

أوعاك^٤ تصرخ.

قطعة الخوفة يستي..

هذي شغلة ثوارتناها عن جدودنا..

لا كنا نعرف طب ولا مطبيين..

الختيارية وكبار السن،

كل واحد أخذها عن أبوه.

إلي بطول بالخلف^٥ بنقطعلو الخوفة،

المطروب^٦ في عنّا كاست الطربة^٧،

بس بכולوا عنها حرام.

١ أعمل لك

٢ مكانين أعلى الظهر وبين الأكتاف اسمهم عروق الوثاب

٣ منطقة ما بين الإبهام والسبابة

٤ تحذير إياك

٥ يعتقد في فلسطين ان التأخر في إنجاب الأطفال من الرجال سببه الخوف

٦ الخائف من شيء مرعب

٧ كاس من النحاس يكون له شكل مزخرف ويوضع فيه ماء تحت ضوء القمر ويشرب

الماء بعد القراءة عليه بآيات من القرآن الكريم

للولاد لزغار بنخرعو^١ يستي وبنطربو^٢
وبعركبو^٣، بكون الولد سخن ومملوع^٤
من شيل خوانو إلو، تنهم شالوه غلط،
وبملعوه ملح، بتجيني هالنسوان
وبكطعلهن لولادهن لكبير ولزغير بخاف.
الخوف معلهوش كبير ولا مقمط^٥ بالسريـر.
وهذي عداتنا وتكاليـدنا..
من أيام لبلاد مبنحيدش^٦ عنها،
ولا عنها غنى مهما تكدم الطب والطبيـة.

- ستي في حد غيرك بعرف يقطع الخوفة بدير البلح؟

- وله يستي الخيرين كثار...
عندك بسمع بכולوا أم العماوي^٧ شاطرة
هذي بشارع أبو حسني،
وكان المنسوم العزايزة^٨،
الله يرحمو، في بشارة،

-
- | | |
|---|---|
| ١ | يخافوا خوف شديد يسمه خرع |
| ٢ | خوف شديد ينعكس على السلوك |
| ٣ | يصبح لديهم الآم في الساقين والأيدي نتيجة الخوف |
| ٤ | درجة حرارته مرتفعة |
| ٥ | ملفوف بملفات قطنية وتسمى الكافولة |
| ٦ | لا نبـدلها |
| ٧ | امراة من عائلة أبو ربيع من مدينة دير البلح، يقال لها أم العبد، تقطع الخوفة ويعرفها الناس |
| ٨ | رجل معمر من عائلة العزايزة يسكن مدينة دير البلح، وكانت الناس تلجأ له لقطع الخوفة وتجبـير الكسور |

أو وليد أبو مصبح عند العيادة بالبلد،
وأبو طارق جودة عثمان^١ سوافيري^٢ بالمخيم،
وأبو بلال الحوش
في المخيم أبو دغيم^٣،
وكثار إيلي بكطعوها.
بس كلي كيف صرت هلحين؟

- والله الحمد لله يستي
حاسس حالي طاير وتفكفكت.

-
- | | |
|---|---|
| ١ | رجل من عائلة جودة من بلدة السوافير من مدينة دير البلح كان يمارس هذه العادات |
| ٢ | بلدة فلسطينية محتلة |
| ٣ | رجل من عائلة أبو دغيم من مدينة دير البلح كان يمارس هذه العادات |



فايضة^١

- وين كاين يستي
مطين^٢ ومبهدل أواعيك؟

- كنت طششلك طشة^٣ خيالة،
مع ناصر أبو عبيد.

١ الفائضة عادة تقليدية عند العرب والبدو وحتى الفلاحين الفلسطينيين، وهي ان رجل يبيع أو يهدي رجل آخر فرس أنثى من عنده، يلحقها شرط الفائضة، وهذه الفرصة عند إنجابها لأول مهرة أنثى وليس مهر ذكر تسمى «فايضة» وعلى الرجل الذي حظي بالهدية أو اشترى هذه الفرس أن يعيد أول بطونها من الإناث لصاحبها السابق بعد أن تنتهي من نصف عام من الرضاعة، وإلا تصبح بينهم عداوة وقطع انساب، وقد تؤدي إلى مقاطعة وحرب

٢ ملابسه متسخة بالطين

٣ نزهة - رحلة

- آه يا خيال الزرقة^١!!
وإنت كايين راكب فرس من طين،
تمبهذل حالك ومغبر،
وفش إشي منك ميين؟

- مهو يستي الفارس أول ميتعلم
بقعلو أكم من وقعة.

- والله يستي هيتك
كاين تدحرج دحرجة مش توكع.
الله يرحم ستك خضرة^٢،
أم أبوك، نهار كلتلي
كاين أبوها يكنى^٣ خيل،
وكاينالو فايزة عند أهل برير^٤.
برير هذي قرية فلسطينية
بين الفالوجة وسمسم في النص يمك،
ومنها وشركة عرب لجبارات
والسواركة والثوابثة،
ومنها وشمال لحليقات
وبيت طيما وعراك سويدان،
ومنها وكبله، هوج ونجد

١ رجل من دمشق اسمه محمد الملحم، كان يقال له خيال الزرقة كناية عن لون الخيل

التي يركبها

٢ خضرة قشطه من بلدة زرنوقة ست الكاتب من جهة أبوه

٣ يربي

٤ قرية فلسطينية هجر أهلها الى غزة

ومنها وغربة بيت جرجا ودير سنيد^١.

- هي ستي خضرة مش من دار كشطة؟

- آه من دار كشطة من زرنوكة،
مش كشطة الرفحيه^٢.

- هوا إيش يعني فايضة يستي؟

- الفايزة يستي عادة عند العرب،
وأهل لبلاد من زمان.
كاين إذا حد أهدي حد فرسه،
ولا شراها منو شرية،
ييقالو^٣ عندو فايضة...
أول بطن أو بطنين منها
بخدهن إلو إذا كانن نثايا،
من حك البايع، أو من حك المهدي لهدية.
وإذا كان ذكر من حك الشاري.
واجب الشاري ويللي أخذ لهدية.
وكانو يكلو عنها عطية كمان.
يوصل الفايزة مزركشة^٤
لباب بيت البايع وله العاطي،

١ قرى وبلدات فلسطينية هجرنا منها إبان النكبة

٢ مدينة رفح جنوب قطاع غزة

٣ يصبح

٤ مزينة بالتطريز الفلاحي أو البدوي

بعد متخلص لبنها من أمها نص حول.
الحول يعني السنة يستي.
أهل برير كانو مشهورين بكنواة الخيل،
ويهتموا فيهن وعندهم أصايل،
معروف أساسها وراسها¹.
وكانوا بحبو الخيل ويوجبوهن.
لا يحرتو عليهن، ولا ينكلوا عليهن إشي.
يرعوهن ويزينوهن،
ومتشفهنش غير بالسبك وبالأعراس يركصن².
وكانو يسموهن أسماء حلوة وجميلة:
إلي بכולوا عنها الزركة³..
وإلي يכולوا عنها لحمرية⁴..
وأم رطام⁵.. وعنان⁶..
والسلك⁷.. ومزركشة⁸..
والخضرة⁹.. ولمحجلة¹⁰.. واللعبية¹¹..
وكثير أسامي.
وكانوا يכולوا الأصايل

-
- | | |
|---|----|
| أصايل الخيل يعرف أنسابها من أمها ومن أبوها ونوعها وقوتها وقوة تحملها | ١ |
| كان الخيل الأصيل له احترام، لا ضرب ولا يهان ولا يستخدم في النقل والفلاحة. فقط يستخدم للزينة والرقص في الأفراح والسباق والتباهي والحرب | ٢ |
| لونها يكون رمادي فاتر وقريب من الأزرق | ٣ |
| لونها أحمر | ٤ |
| شفتيها عريضة | ٥ |
| طويلة | ٦ |
| سلق سريعة | ٧ |
| مزركشة منقطة | ٨ |
| لونها قريب من الأخضر | ٩ |
| راقصة | ١٠ |

ما بتنباعش بيع بتنعطى عطية^١.
 والناس تعطي بعض خيل،
 تنعركت قصة الفايضة هاذي.
 وسمعنا كمان كاين في سباك إسمو «برجاس»^٢.
 بوكفو المتسابكين بصفين،
 صف بالغرب وصف بالشرك.
 وبطلع فارس زي البرك نحيت الصف الثاني،
 وكبل ميصّل بلف وبيجي راجع
 حنيتها بلحكو فارس من الصف الثاني،
 وكبل ميصّل الصف الثاني بلف وبرجع،
 وكانت الناس يستي تشرط شروط عالخيل
 إالي تنعطا عطية.
 إنهم ميشغلوهاش، ويهنوها..
 ولا يحملو عليها إشي ويتعبوها.
 وإنها ما تكلط نهر الأردن،
 ولا تيجي جاي على مصر^٣ نواحينها.
 طول عمرهم يكلو سباك العرب، لا غالب ولا مغلوب.
 كانت الناس حلوة في بعض واسمن خيلها وتحترمها.
 اليوم ذوبها تحترم بعض بكفي،
 ومش الكل يحترم الثاني.
 أنا عارفة الله يجملها بالستر يستي.

١ من أهميتها ليس لها ثمن يقيمها عند العرب الفلسطينيين
 ٢ نوع من أنواع سباق الخيل وله طريقة متبعة ومختلفة
 ٣ لكثرة القصص التي كانت تموت فيها الخيل اذا غيرت الطقس الذي تعيش فيه كانت الناس تشتري عدم سفر الخيل



عزومة مَرَكِيَّة^١

- سلامو عليكمو...

- وعليكم السلام يستي

- وين كاين؟ بالعزيمة؟

- لا يستي مرحتش أنا..

هيني جاي أتغذى عندك..

إيش طابخة اليوم؟

- جريشة يستي، جريشة^٢ طابخة.

١ هي ضيافة من غير رغبة لدى المضيف، لكرمه أو عدم راحته للمستضاف

٢ طبخة فلسطينية من القمح البلدي مع مرق

- جريشة بنفس طيبة
أحسن من اللحم بِكَلَّتِ الكيمة^١.

- عفارم^٢ عليك إنك مرحتش...
ولّا بتتخاوت^٣ عليّ ولا يناكص؟

- لا والله يستي مرحتش!!

- يا حيف عالناس لوين وصلت معها المواويل
كل هالنسب وهالكراية وبالأخير
ببعتولنا كرت عزيمة مع سواك!
هُمَّه كل ما تحضرت الناس وتكدمت
بتصير تكل كيمة بعضها يستي؟

- إندقيش^٤ يستي وتخدش في بالك..
هذول طول عمرهم قليلين فهم.

- أنا يستي بحكيش هيك خراف^٥ والسلام..
أنا بالعشم^٦ بحكي يستي.
گُرْب جاي، گُرْب...

١ قلت الاحترام

٢ ممتاز، كلمة عثمانية

٣ تمثل

٤ لا تكثرني

٥ كلام

٦ بالأمل

- وين الكراسي إالي عندك رايدات؟^١

- كُرب جاي، كمبز كمبزة^٢

إنت كمان بدك تعملي فيها متطور^٣!!

- إنتي هالحين بدك تفشي غولك في!

- خليني أتفشش يستي...

- طيب تفششي... إيش هذي لجريشة؟

مع بندورة زي مبتعملها أمي؟

ولّا جريشتك الزاكية إالي باللبن؟

- هي أمك من وين علامها؟ مهو مني يستي.

هذي باللبن خليها تبردلها شوية بس...

ولك بالك عملوا مناسف ولّا مفتول^٥؟

أكيد اللحمه حبطرش^٦..

- إنتي بتصيدي^٧ في يستي.

١	ذاهبات
٢	إجلس القرفصاء
٣	متقدم وحضاري
٤	عصيتك
٥	أكلة فلسطينية مشهورة
٦	كثيرة ومتناثرة
٧	توقعيني بالفخ

بِحلفك بالله قاعد، إني مرحتش..
بتقليلي حبطرش!

- أصيد فيك! هو إنت بتتصاد...

هلحين بعرف من أكلك

إذا مغبتش^١ بالجريشة غب،

زي عادتک، بکون صدّک یستی.

- طب هوا إنتي ليش زعلانة وحمقانة؟

عالموضوع هالقد يعني؟

- يستي هذي دناوة^٣، وكَلَّتْ أصل

تَتَعَزَّمُ النَّاسَ بِمِرْسَالٍ مَعَ السَّوَاكِ.

زماااان، الله يرحم زمان، كانت الدنيا دنيا،

والناس تحب بعض، وتوالف^٤ على بعض،

لا كان في كروت عزيمة ولا جوالات ولا تلفونات،

كانت الناس تلف على بعض لف

نهارين ثلاثة يكونوا خلصو.

يمر عليك صاحب الفرح،

يٰطُكْ عَلٰى بَابِكَ وَيَتَفَضَّلْ وَيَشْرَبْ كَهَوْتِكَ،

ويوكل إلى كسمو الله،

وتشوفوا ويشوفك، ويكلك أخبارهم الحلوة،

۱ اُکلت بهمه

٢ تتصرفين بعصبية مفرطة

۳ قلة کرامۃ

٤ تنسجم

وتكـلـو أخباركم الحـلـوة وتنبسطو مع بعض،
ويروحـو بشـوال^١ لمون ولّا برتكان
ولّا كطف بلح،
ويروح عازمك وهو مبسوط..
ويتمنى جيتك نتفه بنتفه^٢.
اليوم كل واحد بعزم إيلي خلبكلو^٣
وإلي إلو عندو فائدة ومصلحة.
المحبة راحت والاحترام راح.
ويللي بعزمك عزيمة مركبية بتبطل تعزمه بالمرة،
وبتتفرّك الناس عن بعضها وتبطل تطيك بعض.
هاض كلو من كُلت لكبار، لكبار ماتوا
وصاروا لزغار يعزموا، والنسوين تتحكم.
أي والله بذكرلك إنو جدك إيلي هو أبويا، الله يرحمه،
كان لما ينوي يعمل عزيمة،
يركب هالحمار ويطلع.
يغيب غيبـتو، يومين ثلاث.
يلف على البلدات إيلي حولينا كلها
تيعزمهم مختار مختار،
وگريب گريب. كان يطلع من زرنوكة^٤
على السوافير الثلاثة: الغربية والشركية والشمالية^٥،

-
- | | |
|---|-------------------------------------|
| ١ | كيس |
| ٢ | لحظة بلحظة |
| ٣ | على هواه ومصلحته |
| ٤ | بلدة فلسطينية، بلدة الكاتب |
| ٥ | بلدة فلسطينية لها ثلاث أفرع جغرافية |

ويرُد جاي. يعزم بينا وبحمامة^١،
وكانلو رفايك إبيت دراس^٢. مايخَلِّي حد إلا يعزمو.

- وبلكي^٣ يكون عرس؟

- لا يستني اللفات هذي على كد لظهور^٤ بس،
العرس كان يبعد أكثر بالعزائم.
يروح بالباص على العجمي بيافا وعلى كلنسوة^٥
وملبس^٦، وكانلو رفكة لداوية يعزمهم كمان بمدينة اللد^٧.
أنا عارفة بس إيش صرلها^٨ الناس؟
الله يكملها بالستر بس...
كيف لجريشة عجبك؟

- يسلم إديكي يستي.

١	قرى فلسطينية مهجرة
٢	قرية فلسطينية مهجرة
٣	هل تظن
٤	ختان الذكور
٥	مدن فلسطينية يوجد فيها عرب الى ألان
٦	مدينة فلسطينية اسمها كفر قاسم يقال لها ملبس
٧	مدينة فلسطينية يوجد فيها عرب الى ألان
٨	ما الذي جرى لهم



الضرة مرّة ولو كانت جرة^١

- ستي هو سيدي كيف تجوز عليكي؟
يعني كيف إجالو قلب
يسيب هالقمورة هادي، هههه...

- الله يجبر بخاطرك يستي،
مهو مش بيدو غصمنعنو^٢.
هاض بالسبعة وستين تصار الكسم^٣،
اليهود أخذوا غزة والكدس سنتها،
وكان حنيتها^٤ سيدك، الله يرحمه،

١ مثل فلسطيني مشهور

٢ مجبر

٣ حرب سنة ١٩٦٧، عند قسمة القدس والضفة الغربية عن باقي المناطق

٤ لحظتها أو أثنائها

عند خوانو بالعريش^١.
وطولت الكِصة، سنة، سنتين.
يعني بدو يضل من غير مرا^٢.
تجوز الله يسامحو، ويرحمو، أخرا مرة.

- يعني إنتي يستي معمر كيش شفتي ضرتك؟

- بديش هالشوفة يستي،
كلوها زمان «الضرة مرة ولو كانت جرة».
إسمعلك هالخريفة^٣ هذي مذاك^٤ جبت السيرة.
كال بالكسطل^٥ كاينة هالمرا، زعيمة وكد حالها.
هديك الكسطل كرية فلسطينية،
اليهود ذبحوا أهلها ذبح يستي.
نجنو عليهم لأنو صارت فيها معارك طحن^٦،
طحنوا اليهود فيها طحن.
وفي واحد زعيم كبير كان إسمو عبد الكادر الحسيني.
كالو إنو استشهد هناك^٧.
هي من الكدس وغاد، لغربة شوية.

-
- | | |
|----|--|
| ١ | مدينة مصرية شمال سيناء، وكان الذهاب إليها قبل الحرب سهل جداً |
| ٢ | امراة |
| ٣ | الحكاية |
| ٤ | لأنك |
| ٥ | قرية فلسطينية قريبة من القدس استشهد فيها عبد القادر الحسيني بعد معركة طويلة مع قوات الاحتلال |
| ٦ | كناية عن شدة المعركة |
| ٧ | بالتحديد |
| ٤٢ | |

وفيهام مكام شيخ كانوا يكلولو مكام الكركي^١.
 وهاملرا الكويّة بتحب جوزها، يبيّ كديش.
 وعائشه معو من سنين ومهنيها،
 تمخليها مش نكصها حاجة.
 بس هي كوية وكد حالها.
 كاينة بنت زعيم من زعمة الثورة،
 إالي صائرة بالسة وثلاثين ضد الخواجات لانكليز.
 وضایل لأبوها وأهلها سيط^٢ وتعال وتفرج.
 وكاين جوزها يحترمها ويحبها يبيّ كديش،
 تنها متجوزاه سنين وأيام،
 لحد كبل الثمانية وأربعين بشوية^٣،
 ومش كاينة تخلف^٤، ولا تجيب ولاد...
 وتنهم متهجرين من الكسطل،
 إجو وسكنو زيكننا بطول كرم^٥،
 كبل منيجي إحنا على غزة،
 هيك كانت تخرف أمني.
 تنها حاسة بلازمة^٦ لولاد ولعيال..
 كالت لجوزها: بدي إياك تتزوج.
 كلها: يا بنت الحلال تفي من تمك^٧، إيش بتكولي.

١ معلم تاريخي

٢ سمعة طيبة

٣ حرب سنة ١٩٤٨

٤ عاقر

٥ حدنا - مدينة فلسطينية شمال الضفة الغربية

٦ بضرورة

٧ مثل فلسطيني يستخدم للدهشة والنكر

كيلالو: زي مبڭلك لولاد سند وزريعة^١.
 مليح مامتنا بهالحرب، ومفیش حد يضل ورانا أنا وياك،
 بكرة بنكبر بنلكيلنا ولد نتعكر عليه.
 كلها: منتي شايقة دشرنا إلی ورانا، ولي كدامنا،
 هوا أنا حيلتي^٢ أتجوز!!
 كيلالو: أنا معي ذهبات عصملي^٣ من أبوي،
 خذهن وتجوز فيهن، أنا راضية إنت إيش بدك فيّه.
 ضالة تزن عليه والزنّ عالذان أکوی من السحر يستي.
 كيللها: بتزوج بس عندي شرط.
 كيلالو: اشرط زي^٤ مبدك.
 كلها: بطلع على بلدة ثانية،
 أسبوع، أسبوعين، بتزوج وبجيب العروس وباجي.
 كلتلو: زي منت شايق مش كيلالك لا.
 طلع على بلدة ثانية وسيبها لحالها،
 فش أسبوع، أسبوعين، لهو جاي بالليل.
 لاكتو ملاكاه^٥ حامل هالعروس حمل على إيديه،
 ولففها بالعباية والبرنص^٦ على وشها تنها مش مبین منها
 لا أظفر، ولا خصلة شعرة وحدة.
 دخلها بالغرفة وغطاها.

١	ذرية
٢	عندي أو معي
٣	ذهب عثمانی
٤	تلح
٥	مثل
٦	قابله
٧	غطاء على الوجه

كلتلو: بدكاش تعرفنا عليها؟
كلها: هي هالحين تعبانة من السفر،
خليها نايمة، بكرة بتصحى وبعرفك عليها.
تنو صحي الصبح حمل حالو وراح على الشغل.
كعدت المرا تستنى عدها كامت من النوم،
عدها كامت، مكمتش!
أترية^١ مسكر عليها الباب.
تنده عليها، أطبل بتردش العروس.
تنو جاي، لكى مرتو الأولانيه بتصبح وبتنوح.
كلها: مالك يامرا؟ اسم الله عليكي مالك؟
كلتلو: شايف، شايف مرتك إيش عملت؟
طلعتلك من الغرفة وكسرت المزهرية بوشي،
وصرخت، وسبت علي، وشوي وتضربني،
وهيها أكلت ورجعت نامت..
إن شاء الله بتطفح^٢ الأكل.
كلها: عروستي عملت هييك؟
كلتلو: يعني أنا بكزب!
كلها: والله للعن كلب أبوها، زيحي غاد^٣،
هاقي مطرك اللوز^٤
فتح الغرفة ودخل، ودخلت وراه
تتشوف إيش بدو يسوي.
كلتلو: وحد الله يا راجل...

١ اتضح

٢ تنقياً

٣ ابتعدي

٤ عصاة من شجر اللوز-قاسية

كال: لا إله إلا الله، وضرب العروس على رأسها.
لهي العروس طلعت جرة فخار كبيرة،
ملفوفة بفستان عروس وبرنص،
وكامت لهي هاكشه هكش^١ من الضربة،
وتنتورث^٢ على السرير وبكل الغرفة.
بحلكت^٣ عنها مرتو، وكالت: يا ويلى
تاخزنيش^٤ يا جوزي،
«الضرة مره ولو كانت جرة».

١	تحطمت
٢	تناثرت
٣	دققت النظر
٤	لا تعاتبني



بعونا بيع العرب

- ولك يستي إنت بادر زريعة البكدونس بالحواض؟
ولّا مجورهن من غير متبدر؟

- له يستي بيحي بعشرة شيكل بقدونس رشيت!

- أنا عارفة يستي صرلهن خمستعشر يوم مش طلعات.

- يمكن من الصقعة يستي مطلعنش لسه بطولن!

- معنهم يكولو أرض الفخورة خصبة أهل دير البلح،
بس أنا شيفاهها مشيدة.

والله يستي بذكر ثلاث أيام
كان البكدونس ييزبز^١ من الأرض،
وتشوفو بنعف نعف^٢!

- إنتي يستي ضلك حسري^٣ قلوبنا على الأرض.
مخلص الأرض راحت ولوطن راح،
والقضية كلها قاعدة بتروح.

- تف من تمك ولك يا هامل^٤
فش إشي بروح... الحك برُحش...
طول مابطن فلسطين بتلد رجال..
وفلسطين بتحب بالرجال.
هم العرب إلي بعونا بيع.

- ستي طول عمرهم بيقلولنا:
طبلولكو على التنك^٥ وشردتو... قال صحيح الحكي!

- طبلولنا على التنك!!
إن شاء الله بنطبل عبطونهم إلي بحكو هيك..
والله يستي إلي شفناه ما حد شافو.

١ يخرج من الأرض

٢ يتكاثر بسرعة

٣ تؤلمي

٤ كلمة تستخدم للتحقير

٥ صفيحة زيت من الصاج

منيلين^١ إحنا الفلسطينية!
 بعونا بيع.. بعونا كلهم... الدول العربية إالي بعتنا.
 والله لتذكروها بلادكو..
 إنتو بتفكرو حالكو عايشين؟
 كيف لبيوت هذي؟
 كنتلنا بيوت.. تسييناها ودشرناها
 بحالها وبمالها كلها عفش
 وحلال ودجاج وحمام.
 لبيوت كلها ملانة... دشرناها ورانا.
 طلوعونا منها بالكوة وبالغصب عنا..
 كيف طبلولنا على التنك؟
 والله يستي كذايف وطخاخ^٢،
 ليل نهار... وتصارى الناس
 تيجي تلا الرملة^٣ عنا،
 وتخرف خرريف بتكشعر البدن.
 إالي يگلك الهغنة^٤ بغتصبو،
 ولي يگلك بكتلو وبسركو لبيوت...
 كلشي ما همنا.. لا همنا أرض..
 ولا همنا مال.. كل إالي كان هممنا العرض.
 لمنهم صارو يگولو بغتصبو النسوين،
 الناس خافت على عرضها يستي.
 العرض أغلى إشي الإنسان مملكو.

١	مساكن
٢	ضرب رصاص
٣	مدينة فلسطينية
٤	عصابة يهودية

وايش بإيدنا.. فش بإيدنا حيلة...

العرب دشرونا وبُعونا.

كل دولة منهم بس بدها تتخلص من اليهود

إلي عندها وترميهم وترحلهم على فلسطين.

كل الدول الكافرة والغربية..

أعطو اليهود سلاح.. إحنا مين دور علينا؟

الثوار مسخمين^١ كلال..

وسلاحهم عكد حالهم..

مكُنَّاش حسبين حسابنا.

إشي يگلك مكمهون^٢..

وإشي يگلك بلفور^٣..

- إيش المكمهون هذي يستي؟

- أنا عارفة يستي أبوي كان

طول نهارو على راديو لترنر وستور

بسمع وبتفشش بأمي وبخواتي وفيها.

بالأخير كال يينات لازم نطلع على نابلس،

١ مساكين، مضحوك عليهم

٢ السير هنري مكماهون، الممثل الأعلى لملك بريطانيا في مصر، اشتهر بمراسلاته مع شريف

مكة، الشريف حسين بن علي، بين عامي ١٩١٥ و١٩١٦، خلال الحرب العالمية الأولى

٣ آرثر جيمس بلفور، سياسي بريطاني، تولى رئاسة الوزارة في بريطانيا من ١١ يوليو ١٩٠٢

إلى ٥ ديسمبر ١٩٠٥. عمل أيضاً وزيراً للخارجية من سنة ١٩١٦ إلى ١٩١٩ في حكومة

ديفيد لويد جورج. اشتهر بوعده بلفور الذي نص على دعم بريطانيا لإنشاء وطن قومي

لليهود في فلسطين

٤ مدينة فلسطينية في الضفة الغربية

ولّا على طول كرم^١.
 الثوار هناك كويين. طلّعنا على الرملة^٢
 من زرنوكة^٣، ودشّرنا حالنا ومالنا ورائنا،
 ولا أخذنا إشي غير أواعينا إليّ علينا.
 إليّ يلكيلو شحن يركب فيه،
 وإليّ على حماره.
 إليّ شائلة بإديها ولدين وناسية الثالث بالدار...
 والشمس بتركع فينا من فوق،
 واليهود بركعو فينا من تحت،
 والناس بتجري وبتصرخ وبتتحرر..
 وبتكول إيش إليّ جرائنا؟
 أولها حطونا بالمدارس، أوونا فيهن.
 مصبرناش إحنا.. وتجيننا جاي...
 إليّ راح على الضفة..
 وإليّ راح على غزة.
 ظلينا بطول كرم كم شهر.
 بعدين جينا على المغازي^٤..
 وبعدين على دير البلح^٥.
 وأهل دير البلح^٦، الله يخلف عليهم...

-
- | | |
|---|---|
| ١ | مدينة فلسطينية في الضفة الغربية |
| ٢ | مدينة فلسطينية مهجرة |
| ٣ | مدينة فلسطينية مهجرة |
| ٤ | ما الذي حصل لنا |
| ٥ | مخيم لاجئين في قطاع غزة |
| ٦ | مخيم لاجئين في قطاع غزة |
| ٧ | مدينة وسط قطاع غزة، أهلها فلاحين وكرماء. سميت دير البلح لكثرة أشجار النخيل فيها |

كل عيلة من العيل توخذ عندها عيلتين.
دار مهنا كانوا ساكنين هان،
ورا جامع البلد، محل المحكمة الشرعية،
من المسمية^١ هذول
كعدوهم دار أبو سليم بأرضهم،
بيجي ثمن عيل مع بعضهم.
ودار ريان كانوا ساكنين فوك بالبلد
عند الشهاينة، بيجو أربع عيل، الثانيين
من المجدل^٢ هذول.
وحنا گعدنا بالفخورة عند البشايرة.
كانت دورهم طينة، وعكد حالهم، سترتنا.
ودار ثابت كانوا تحت بالعمرة،
برضو عند البشايرة،
من المسمية برضك هذول.
ودار العصار ونصار من جولس^٣،
هذولاك كعدو عند السلقاوي كيلة بالبركة.
وعوايل البحصه من السوافير^٤
كعدو عند دار أبو سمرة غربة.
ودار عزام كعدو بالزوايدة
عند عرب النصيرات من بيت دجن^٥. عزام

-
- | | |
|---|---------------------|
| ١ | قرية فلسطينية مهجرة |
| ٢ | قرية فلسطينية مهجرة |
| ٣ | قرية فلسطينية مهجرة |
| ٤ | قرية فلسطينية مهجرة |
| ٥ | قرية فلسطينية مهجرة |

وعيلة مزروع من حمامة^١،
كانوا عند الفلايتة عائلة الفليت.
وأبو عيشة كمان من جونس،
كانوا عند عيلة أبو عيسى.
وأهل كوكبة^٢ كانوا ببشارة
عند عيلة العزايزة.
وتوزعت الناس كل أربع عيل على عيلة.
عارف بدنا نحطلنا شوية زبل^٣ عالبكدنسات.

- يعني يا ستي مكانش في مخيم؟

- مخيم إيش يستي!
المخيم كانت أرض كبيرة فاضية
وكلها أثل. وين أو وين
تاجت الوكالة والعالم
وسوولنا فيها خيم.
كبل كانوا الدراوية^٤ مستضيفين.
الناس ببيوتهم وفرولهم ميه،
ويعطوا، والله ما كصرو.
ومكانش في كهرب
الناس على الكنديل واللمض الكاز.


١ قرية فلسطينية مهجرة

٢ قرية فلسطينية مهجرة

٣ روث دجاج يستخدم سماد للأرض

٤ أهل دير البلح يقال عنهم الدراوية

والله ما شردنا^١ شراد الهمل يستي.
بس مكانش بإيدنا حيلة.
بدنا نكابل اليهود بعصات الراعي يعني؟؟؟
هينا الحمد لله صرلنا بيوت،
وعمرنا، وصرلنا مكاومة،
وبنفر جيهم اليهود والعرب معهم.



بتعرفش مرتك إلا لما إيدك تقصر^١

- كالولنا زمان يستي كايئة هالخريفة،

بتطير العكل من الراس.

كال حرام تكول لواحد أعور أنت أعور.

الكلمة هذي عاهة^٢ حرام تكولها،

كفر، بدك تستغفر الله،

هيك كانو يكلولنا لشيوخ.

كاين هالواحد الأعور وأسمر وشنع^٣

وإلو هالفرس لكبيرة.

بس مبسوط وغني، تجوز وحدة حلوة، منيحة، عدية.

كل يوم يركب هالفرس، وييجي بهالخرج^٤ ملان

١ مثل فلسطيني مشهور

٢ إعاقة

٣ قبيح

٤ جيوب للحصان

الشكتين، عليمين وعشمال الفرس، ملانات.
 وشو هامرا تبوس إيديه ورجليه وتبوسو.
 ويحبيبي ويعيني ويروحي..
 مضت الأيام معاه سنين وأيام وليالي،
 وبنعف^١ ليرات نعف عليها.
 يوم راح لزلمة شيخ كبير زي حلّاتي هلكيت،
 كلو: أنا يعني حب مرّتي إلي بفضاعة^٢.
 بتطلع في حالي، بلاكي حالي مش هضاك إلي حد يكبلني،
 بتحبني، بتبوسني، بتعبطني،
 إيش السبب؟ معكول هاض حب حكيكي؟
 كلو: الشيخ إنت إيش بتسويلها؟ إيش بتعمل فالبيت؟
 كلو: أنا لا مكصر، ولا مخلي عني جهد، مكنعها من كل حاجة!
 مصاري، أكل، شرب، من جميعو..
 كلو: بتعرفش مرتك إلا لما إيدك تكصر.
 أكعد يومين، ثلاث، أربعة، متخذلهاش حاجة.
 يوم طلع بهالفرس وإجا خرجو فاضي..
 نزل عن الفرس، إجتو، مسكت الخرج لكيّتو فاضي، رمتو.
 ثاني يوم نفس الكرة^٣، كشرت ولويت بوزها.
 ثالث يوم بوّزت من غير متحي.
 رابع يوم گلها: تعالي إنتي إربطي هالفرس وخذي الخرج.
 كلتلو: إنت طول اليوم رايح جاي خرجك فاضي،
 عlish كاعد حميني بعورتك؟

١ يبعثر

٢ بغرابة

٣ تكرار

يعور يلي صارلك، يلي جراك، يلي ويلى...
كلها:.. آآآه، أنا أعور؟
كلتو: أعور ومجرم وشوفتك بتكزز^١، أنا مليح يليي گبلاك.
كلها: إذن كابلة مصاريّة^٢، وخيري، وحالي.
هلكيت إالى عرفت حالي أعور، أنا بعرفش حالي أعور...
هاض كلام الشيخ.
علي الطلاك منتي كاعدة فهاددار، طلاك عباب الدار.
راح للشيخ كلو: إالى صار هيك هيك...
كلو: هلكيت عرفتھا... لونها ضلت صامطة وصبرت وشافتك كصرت، آه منيحة
إما مزالها بترمح وبتجري على شان خيرك وحجاتك
لا بتلزمكاش، تزعلش ياعمي اتديقش نفسك، گلوها زمان
«بتعرفش مرتك إلا لما إيدك تكصر»،
مليح إالى بينت على حكيكتھا كبل متزرع منها^٣.

١	مقززة
٢	فلوسي
٣	تنجب منها ذرية



ابن العذرة!

- ول... ول... إيش هالطخخة؟

صرعونا يصرع كلوبهم...

لويش كعدين بطخخو هذول يستي؟

- هاض يستي أبو بشير إلو عشرين سنة بخلفش...

وربنا أطعمو ولد اليوم... فرحانين الناس، وبطخخو...

- طيب طيب.. ربنا يفرحهم ويطعم كل مشتهي... هات

كربلي هالعكازة تنكعد بالشمس نجمص عظامنا.
 كَرَب.. كَرَب.. تتعَجز عليك.. إنت عكازتي يستي...
 في عَشَباك بركانتين^١، روح جيهن تنوكلهن.
 البرتكان بتكلش غير بالشمس...
 اكعد.. اكعد.. وكشر هذنها^٢،
 الخوصة^٣ مغزوة^٤ بالزيتونة...
 أنا عرفاك بتحب الخرايف تبعتي.
 بدي أخرفك خريفة،
 خرفونا إياها زمان عن «ابن العذرة».
 كال إنو كائنات تنتين سلفات
 مسيحيات، وحدة بتخلفش،
 ووحدة مخلفة، وربنا معطيها بنت وولد.
 وفي سنة من لسنين حملن الشنتين مع بعض،
 كل وحدة بطنها صار كدامها شبرين.
 وبليلة فش فيها ضو تاجاهن الطلك،
 كامو جوازهن حملوهن على لتركتور
 ليطلعو فيهن على بلدة ثانية فيها داية.
 كايه الداية تبعت بلدتهم ميتة.
 كالوا إنهم من بيت سحور^٥.
 هاذي حامضة البرتكانة تعطينش منها...
 وروح يالتركتور وبنص الطريق إكلب.

١	برتقالتين
٢	هذي هي
٣	السكين
٤	تم وضعها
٥	قرية في قضاء بيت لحم

كلب عحفاف الطريق بوادي النار...
 هضاك وادي النار تلا نابلس..
 بتطلع من بيت سحور، يلي كضى بيت لحم،
 وإنّ رايح على أريحا،
 وادي وعر، وغميك
 وكلو لفات، لفات، كنو ثعبان.
 اشبدك بالطويلة.. كلفّتو^١ حالهم بعد موكعو،
 ولكيولهم طرمبيل^٢ ثاني، وكملو طريقهم فيه
 توصلو الداية. بلشت بالحوامل السلفات،
 من غير إحم ولا دستور، تولد فيهن.
 تنها خلصت صاح بطن مش بطنين!
 الجوز إلي بخلف مرك ليشوف مرتو
 لكاهها مخلفالو ولد زي الكمر.
 وليكي مرت أخوه مغما عليها ومش دريانة بحالها.
 الداية كلتلو ابن أخوك مات من الوكعة إلي وكعتوها.
 كال لمرتو: اسمعي يما..
 بدنا نكول إنو ابنك مات..
 وهاض إلي عاش ابن أخوي.. ونعطيه إلهم. حرام إلهم
 عشرين سنه بخلفوش، إيش رأيك؟
 كلتلو بنت الناس لمأدبة: إلي تشوفو بين عمي.
 كلها: أصيلة. أنا عارف الموضوع صعب عليكي
 بس ربنا بصبرك إن شاء الله
 وأوعي تكولي لحد هالسر.

١ شدوا الهمة

٢ مركبة

أجا أخوه وفرح بالولد إالي أجا بعد عشرين سنة شوك،
وحزن على ابن أخوه وكلو بعوض عليك الله.
صار الأخو إالي بخلف وابنو عاش ينهك^١ زي النسوان نهك
هو ومرتو، والأخو إالي ابنو مات
مفكرهم بنهكو على ابنهم الميت،
ومش دريان إنو ابنهم عاش
واعطوا إلهم، وهُمَّه إالي ابنهم مات.
هذي البرتكانة أحسن من إالي كبلها...
هذيك بتحمض الكلب.
روحوا عالدار، وحدة حزنانة ووحد فرحانة.
إجا الولد يرضع من مرت عمو، مكبلش عليها.
تَعْطوه لأمو الحكيكية، كبل عليها وصارت ترضعو.
شايف سبحانه الله ربنا ما قطعها...
وكبر الولد وصاروا يكلولو ابن العذرة

- طيب يستي هوا مش كاينة القصة سر؟
انتو كيف عرفتوا فيها؟

- مش بلكك إنت صاير مسكع...
كوم من خلكتي روح شوفلك شغلة تشغلك.. ما أسكعك.



جبنا لكرع يونسنا، شلح طكيتو وخوفنا^١

- إحنا يستي من وكتيش عايشين بغزة؟

- كبل السبعة وستين يستي مكنوش^٢

الخواجات كحشين^٣ غزة.

كانلّك هالحاكم العسكري لكرّع

يكطّع إسمو... والله نسيّاه...

يحرّك حريشو^٤

إسمو طار من بالي.. معنّو بنتساش،

من كتر وطاوتو^٥..

١ مثل فلسطيني مشهور

٢ ليس بعد

٣ حاصلين

٤ يحرق كل من يتحرش بك قبل أن يؤذيك

٥ دناوته

خفاله إسمو سعد أبو طكية^١..
والله يستي أنا وعيت وإحنا سكين بالمغازي^٢..
وكان جمبنا لسبتطار^٣..
ومن لسبتطار وغاد..
كان كمب^٤ الجيش المصري تبع أبو طكية.
كانو يَكولو إنهم جايين
أبو طكية علساس يحمين..
ومكانش حد يخوفنا گدو..
يكطعو ويكطع سيرتو.
كانت الناس من كَلَّت الحيلة،
إلي يخذلو بيض..
وَلِي يخذلو ذكر بط..
وَلِي يخذلو إلی كَسَمو الله..
تيرضوه، ويرضو كرعتو لِمَصَدية.
أبوي خطرة كللنا..
إنو سkena كم يوم بطول كرم
أول متهجرونا..
بعدين إجينا جاي على المغازي.
وبعدين زي منت شايف هدحنا بدير البلج.
- هو إحنا يستي كيف تهجرونا وسبنا لبلاد؟

١ حاكم مصري لغزة

٢ مخيم للاجئين

٣ أصل الكلمة تركي عثماني: اسْتَيْتَالِيه باللغة العثمانية (التركية القديمة) كانت تعني مكان

العلاج.

٤ مخيم

- هو هو كِصتنا طويلة يستي مشوار بِسَمِ البَدَن.
بحكيلك إياه بعدين... بدو حكاية لحالو هاض.



مسخن فلسطيني^١

- ستي إيش رأيك بكرا الجمعة
تيجي تتغذي عندي؟

- الله يجعلو عامر يا ستي.
والله يستي آخر همي الأكل،

- أي إحنا على الأكل يستي
والله بنتونس فيكي.
والبنات بكيفو لمنك تيجي علينا
وبتحطينا البركة بجيتك...

١ أكلة فلسطينية مشهورة بالأخص في قرى الضفة الغربية عبارة عن خبز شراك عراقي ويغمس بزيت الزيتون ويوضع فوقه البصل المفروم واللوز والصنوبر مع الدجاج والسماق

- طيب يستي وإيش بدك تغذييني؟

- أطلبني ومني إلي بدك إياه.

- والله يستي مش جاي على بالي غير لمسخن.

- تكرم عينك.. أحلا مسخن لعيونك يستي...

- عندك زيت شملاي؟^١

- عندي شملاي وبلدي شريته

من خليل «بشير أبو العبد».

- آه هاض خليل ابن عبد العزيز،

زِئاتو مزبطات دوكتهن كبل هيك.

- شمعنا يستي بتحبي لمسخن

عن بقيت الأكلات؟

- هاض يستي إحنا الفلسطينية

كل ناس وكل بلدة وكرية ومدينة

إلها أكلة غير شكل^٢ عن الثانية،

حسب متعودت تمامنا.

١ نوع من زيت الزيتون مرغوب جداً

٢ مختلفة

أول إشي كل الأكل خير وبركة..
وإلي كسمو الله نعمة..

بس من زمان زمان
كل بلدة فلسطينية مشهورة بأكلة معينة.
عندك مسلاً.. أهل خانيونس^١
لكلعية والعكاكدة واللحاحمة

والعبادلة والسلطان
أحب أكلة إلهم اللصيمة^٢.
بجبولك هاللقان^٣ الفخار،
وبحطو القرصة بالنار، العجينة يعني،

بعدين بفتفتوها وبمعصوها^٤
مع زيت زتون وعجر البطيخ،
بطيخ أخضر مش مستوي لسه،
وهاالباذنجان والفلفل.

وبتصير، يَيَّ، مَحْرَكْهَا، هم مشهورين فيها.
وعندك أهل كلنسوة وطول كرم والضفة الغربية
لمسخن أحسن أكلة عندهم،
شراك مغطية بالبصل ولوز
والصنوبر ولحمة هالجاج عليها...
زي منت عارف.

والبدو وأهل السبع وجنين والخليلية
بحبوش غير المنسف، مناسف الضاني.

١ مدينة جنوب قطاع غزة

٢ طبخة بطيخ غير ناضج مع عجينة تخبز في نار الحطب مباشرة

٣ قدر فخار كبير يأكل منه عشرين رجل

٤ يخلطوها

والفلاحين إلي إحنا منهم
والمجادلة طبختهم المكلوبة،
أساسية هذي، وفتت الجاج.
وأهل الجورة عسكلان الكديمة،
هذول أهل السمك. مخلوش إشي بالسمك
إلا عملوه. عملو المكلوبة بالسمك
تصار اسمها صيادية،
صيادين هذول، لنهم كانو بسكنوش
غير على البحر، وتتهم هاجرو
كعدو بمخيم الشاطئ^١،
وبمخيم دير البلح بحد الشط.
وضلهم زي مَهَمَّ صيادين.
وأهل الكرى السوافير وكوكبة
ونعلين وأم الشرايط وغيرها وغيرها
بتلاكي طبختهم من زروعاتهم،
خبيزة وملوخية وسلّك بعدس
وسبانخ و يكطينه وشوش برك^٢
وحماصيص^٣ وكرع أصفر
ودوالي عنب وكوسة محشي
وحليون وفكّح إلي هو الفطر مع بيض.
كل أكلهم خضار بخضار
كليل ميخبصو تخييص بلحمة زي عملتنا.

١ مخيم للاجئين غرب مدينة غزة

٢ طبخة عجّين فيه لحم مفروم باللبن

٣ طبخة عشبية

وفطير بسبانخ
 يستي والله مَفي بعد البصرة،
 ملوخية الناشفة مع الفول المجروش..
 ولّا صحن الكشك، هاض لبن مع قمح.
 ولّا تعملك حبة جبجب^١!
 ولمجدرة، ولجريشة.
 كل هالأكلات فلسطينية يستي.
 والسّمّاكية! هذي أشهر أكلة غزاوية..
 لأهل غزة هواية، والرومانية
 بتنعمل من الرمان الحامض.
 بدك تعرف يستي فلسطين،
 مشان فيها الكدس
 وفيها كنيسة المهدي والكيامة،
 گنلها ويلبكلها^٢،
 يجيها حجاج وزوار من كل مكان بالهاندنيا،
 ويجيبو معهم خبراتهم بالأكل ويوخذو خبرات.
 ونسينا نكلك المفتول، هذي أكلة مشهورة.
 هذي أكلة البدارسة^٣ أهل بيت دراس.
 كول لمرتك متحطش^٤
 سوماك أي كلام على لمسخن،
 إلا سوماك بلدي.

١	لبن مجفف
٢	يصح لها
٣	أهل بيت دراس قرية فلسطينية مهجرة
٤	لا تضع

- ولا يهتمك يستي... هههه...
والحلو يستي إيش الحلو؟

- يَبِّي، مسكين، إحنا زمان
عكد حالنا كنا خبز بسكر
وكعك، مكنش في سميد
زمان زي اليوم، بطحين نعملو،
وملاتيت وبرازك^١.
والله كنا نغمس الخبز بالشاي ومتهنيين،
وعوامة ومهلبية وحجات عكد الحال.
نابلس أم الحلو وأم لكنافة النابلسية،
مهني نابلس هذي
من أكدم المدن الفلسطينية يستي...
والغزازوة شاطرين بالحلو الثانيين،
وكرع بعسل أهل الكدس بعملوها...
هات هالكربة منعن الظربزين^٢
لَبِل ريكي، نشفتلي إياه..
من كثر مخليتني أكرُك^٣.

١ أنواع بسكويت منزلي
٢ البرنذة
٣ أتحدث



يا الله زمان كنا محلانا في بعض...

وشو بنحسب حساب لبعض...
بيوم من هالأيام.. وبليلة من الليالي..
كان أبوي يستي سهران عند المختار فوك...
ورجع متوخر بنص الليل..
أمي بتكلو: ول يزلمي،
وليش مبدل سباطك؟
اتطلع أبوي لقي السباط
إلي برجلو مش إلو.
قال: ول! وش جاب هالسباط لرجلي؟
هذا وكاد سباط واحد من الزلم

إلي كانوا سهرانين معي عند المختار فوك،
وأنا متخربط فيه. وعهد الله
ما كشعتو^١ من العتمة.
وأنا بكون سباطي مخروك،
وطول الطريق رجليّ مبلولات...
هاقي لسراج^٢ يمرة،
لأرجع أشوف هالسباط ملين.
كلتلو أمي: ول يزلمي الصباح رباح..
كلها: بدك يكلولو أبو حسن ذنى نفسو
وسرك سباط؟ يا عيب الشوم!
والله لعرف صاحبو كبل فجّت الضو.
زيحي^٣ غاد من طريكي.
والله يستي وراح أبوي.
بلش^٤ من دار المختار،
وضل يلفلف عليهم
واحد واحد بنصاص الليلي،
وبالأخير عرفو إنو السباط
لو واحد ضيف من برات البلد
إسمو كان أبو ضباع.
كلو المختار لأبوي: ول يبو حسن
بدك تروح عالبلدة تعت أبو ضباع؟

١ رأيته

٢ فانوس

٣ ابتعدي

٤ بدأ

والله لذياب ولضباع بكلوك أكل بهالليل.
كلو أبوي، يستي: يكلوني ولا ما يكلوني..
بس ما حد يكلول أبو حسن ذني نفسو لسباط.
وراحلك أبوي عالبلدة إالي جمبنا
ورجع السباط لأبو ضباع ورجع حافي.

- طيب يستي ليش ما أخذ سباطو المخروك؟

- مهو يستي مرضيش يفيكو..
زَگْلُو' إياه زك..
من تحت بابهم.. ورجع حافي..
ومن يوميتها يستي صارت كل الناس
تخبي عند أبوي غرضانها وذهبها...



إلي ببيع سروالو' اليوم.. ببيع شرفو وأرضو بكرة...

- ولك يا كليل الوجدان^٢

صحيح إيلي كلتلي إياه أم فتحي جارتنا؟

- هيه ليش يستي قاعدة بتغلطي؟

ويش إيلي قالتلك إياه أم فتحي يا ساتر؟

- ولك يا هامل^٣... كال إنت كاين بنص البلد

كاعد بطكتط صور مع أجنييات؟

- هذولاك صحفيين يستي..

جاين يعملو تقرير عن انتهاكات اليهود لشعبنا...

١ لباس يشبه البنطلون الواسع من القماش وتجد له توسيعة ما بين الساقين

٢ عديم الإحساس

٣ شتيمة

- والله يا ستي ما أجانا البلى ولسخام^١
غير من ورآهم هذولي.
خطرة وأنا بنت بنوت إجو لأبوي عالبيارة..
كال بدهم يصورو البرتكان..
وكعدو يصوروك بهالبرتكان برتكانة برتكانة،
تأجو عند سروال أبوي ووكفو..
كال إشو سبولك كل هالبيارة..
وما عجبهم غير سروال أبوي..
وهذيك وحدة بهالشعرات الشكر وهالعيون الزرك^٢
أبدهاش غير تتصور مع أبوي..
كال ليش؟ مشان سروالو..
والله يستي ما رضىش أبوي
يخليها تتصور معو..
كلها كلشي وإلو كيمة
إنتي بدك تتصوري معي
مشان سروالي، هذي كلت كيمة..
وهي ترطنلو^٣ أجنبي بأجنبي..
وأبوي ولا فاهم عليها ولا كلمة..
غير لمترجم كان يكلو شو بتكول.
وبالأخير لما عيونها شر ككو^٤ عالسروال

١	الحزن والتعب
٢	أجنبية
٣	تتحدث
٤	طلعوا

كال بدها تشتريه شرية هالداشرة'...
مرضيش أبوي بيعلها إياه.
وعيونو حمرن من الكهر. كلها أنا ببعش سروالي...
إلي بيع سروالو اليوم.. بيع شرفو وأرضو بكرة.



يا الله كنا ما أكو سنا بالكبار زمان...

- خطرة^١ يستي أجتلك على أمي جارتها
 أم عياد المدنية..
 وخرفتنا هالخريفة.. والله تكولي أنها كذب بكذب...
 كال أشو، نطين^٢ سرسية^٣
 على جيران أهلها بالمجدل^٤.
 هديك المجدل مدينة كبيرة،
 وكلها نساجين وجدالين^٥
 بنسجو وبييعو للناس..

١	مرة من المرات
٢	قافزين
٣	حرامية
٤	مدينة فلسطينية ساحلية شمال قطاع غزة مهجرة
٥	يعملون في النسيج ويجدلون الملابس

وبتلاكي مع أهلها مصاري^١ كثير.
 أشبك بالطويلة^٢... الحاصلو^٣
 نطين على جيران أهلها سرسرية^٤ إثنين بالعدد.
 وهذولاك جيران أهلها
 كلهم مسافرين عبلاد برة،
 ومخليين أمهم المسكينة لحالها بالدار..
 لا بتشكع^٥ ولا بتركع^٦.
 مرا عيانة^٧ وكبيرة بالعمر،
 وهالدار بصرح فيها الخيال من وسعها.
 كال نطين السرسرية،
 لكيينها عيانة وسخنانة وبتفور تفوير من لسخونة.
 كعدين عندها وحطنلها كمدا مية مبردة، ومطبيينها.
 وكعدين يطعموا فيها تخليينها زي البومب^٧،
 ورادة إلها صحتها أخرى مرة..
 وكايمية من فراشها كيلاهم: منو أنتو؟
 كيلنلها: والله يحجة بدك الصحيح
 إحنا حرامية مكطوعين من شجرة..
 نطينا عليكي تنسركك.. لكناكي مرضانة..
 وما هننتي علينا.

١	نقود
٢	لا تكثر طول القصة
٣	الذي حصل
٤	لا ترى
٥	لا تتدبر أمرها
٦	مريضة
٧	قوية

طببناكي لحتى صرتي منيحة.
 كلتلهم: الله يرضى عليكم يمه.
 والله لو ما لحكتوني كان رحت فيها..
 هاض الله بعنكم إلي.
 كلها الحرامي: الله أببعتش حرمة يحجة.
 كلتلو: لا بيعت ببعث...
 والله يمه إلي ولاد سركو عمري كلو..
 وما حد فيهم بطل علي..
 وبعمرهم ما سوو^١ معي سواتكم هذي إلي سوتوها
 وكعدو جمبي وطببوني.. والله يمه برقي كل رمية
 ولا هي.. ولا حد بدرى في غير رب العالمين...
 أوعى يستي اندشر^٢ أمك..
 وتروح عبلا برة... أوعى يستي.

- اجرمنعنو^٣... يستي!!!
 مقبلتيش ولادك يدرسوا برا.

١	فعلوا
٢	تترك
٣	لهذا حصل ذلك



انتفاضة ١٩٨٧

- إيلي عراسو بطحة بحسس عليها^١...

حطيت أكل البطات يستي؟

- آه حطتلهن...

- طيب تعال إكرب جاي...

هاض اليوم أبو حبال أجا وتشكى عليك^٢

- ليش يا ساتر؟

١ مثل فلسطيني مشهور يعني إن الرجل يعرف بالذنب الذي اقترفه، فإن تحدث به أحد

أمامه شعر بالخجل، وعرف أنه المقصود بالحديث

٢ رجل من مدينة دير البلح من عائلة أبو مصبح يقال له أبو حبال

- كال إنت بظلك تنط على بيارتو
وبتخبي بلطات وجنزير وعلب بوية^١.
وكال بכול كمان لاي أواعي^٢،
وغرضان^٣ ملثمين.
والزلة برتك رتك^٤.
كال والله مرضيت أزكلهن^٥
بره البيارة.. لخوف يكلو
معنديش وطنية.. ولّا بحبش فلسطين...

- ولا إلي أي علاقة بالغرضان هذول!!
طيب هو كيف شافهن
إذا هنة مدفونات بالبرميل؟؟؟

- ولك يخويته^٦
هو مكالش إنهن مدفونات بالبرميل!
بس إلي عراسو بطحة
بحسس عليها يستي..
هاض إشي خطر يستي
تستهنوش فيه.
ضبو غرضانكو منيح...

١	أدوات الانتفاضة الأولى سنة ١٩٨٧، كان يستخدمها المثلثون
٢	ملايس
٣	أغراض
٤	يرجف
٥	أرميهم
٦	عديم التركيز

عملينلي فيها مناظلين...
ونصكو حرمية جاج!
ولويش بتلبسو برجليكم كياس؟

- على شان محدش يعرفنا من صندلنا...

- أها!!

منتو مسخمين^١ كل ثلاثة بصندل..
بدبوكو بالتهلكة.. وبكرة بضحكو عليكو..
وبصيرو كایدات على كفاكو.



حب على الطريقة الفلسطينية

- ستي كان في حب على أيامكم؟

- ولا يستي.. بس حبنا غير شكل^١

عن حبكو اليوم... البوانيت^٢ اليوم غير بوانيت زمان...

اليوم إالي بدها تتحومر وتتبودر وطلّيط^٣

حالها من هالسخام^٤.

زمان كانت البوانيت تحط هالكوحلة

١ يختلف

٢ البنات

٣ تدهن

٤ كناية عن وضع سكن النار على الوجه. يسخم الوجه، يسوده

وتكرس خدها وسلامتك..
وتصير زي الكمر فاجة فج.
كان الحب يستي
تودايت الزوادة^١ عالساتين..
تلكيط الزيتونات مع بعضنا البعض..
أنت بتعرف ليش اسم بلدنا زرنوكة^٢؟

- والله يستي أنا قرأت
إنو كاين في بلدنا جداول مياه كثيرة
دخلات في بعض..
بقولو عنهن زرنقة، لهيك سموها زرنوكة.

- لا يستي !!!
هذول الفلسنجية^٣ والمتلفسين^٤
إلي بحكو هيك...
هاض يستي كانلك في عنا بالبلدة بنت اسمها نوكة..
زي فلكت الكمر.. الكل بحكي وبتحاكا بجمالها..
على زمت الراوي إذا صدك..
أنا بحطش بركبتي.
كاينة طويلة، ياي مطولها! وعيونها وسعات.
حبها شب ابن كاضي من بلدة ثانية،
وهالمختار لما عرف طارن عكلاتو طير.

١ صرة الطعام

٢ قرية فلسطينية مهجرة قضاء الرملة، وهي قرية الكاتب

٣ فاضيين ليس وراثهم أي مشغلة

٤ الفلاسفة

- ليش؟

- لأنو كاين هالكاضي مش كاضي لمصلحة مختارنا.

وراسو وألف سيف

ما كبل يجوزها لابن الكاضي.

وغيريش^١ بدو يجوزها لابن أخوه...

ونوكة عاندت وركبت رأسها وما كبلتش.

ضغطو عليها.. ضغطو عليها..

لمنها طفشت^٢...

حملت حالها وشردت بأرض الله الواسعة.

والله المختار ركب هالفرس وطلع يدور عليها..

وكالوا فوك عند لجرون^٣

تلا مدينة الرملة لكيها.

وأول مدخل البلدة وهي راكبة ورآه عالفرس،

صارت الناس تكول بالصوت العالي:

المختار «زر ... نوكة مسك ... نوكة ..»

ومن وكتها صارت البلدات الثانية

تكول على بلدتنا زرنوكة.

وسلامتك يستي هاض حب ولّا مش حب؟

- بس هي قصة حب فاشلة يستي!!

١ ولا بد

٢ هربت

٣ جورن القمح

- فشلها إلی یفشل کلبو مختار البین..
وله إنت صایر مسکع^١ کوم من خلکتی^٢.

١ بارد
٢ من أمامی



العبور^١

- مالك يستي كاعد بتنفخ تنفيخ؟
تعوذ بالله من الشيطان الرجيم.

- أنا عارف يا ستي والله أخبار بتسم البدن.
شوفي هالصورة للناس كيف مرميين على المعبر،
الختايرة والأطفال والمرضائين والنسوين!

- هاض يستي إحنا إالي جنبنا لحالنا..
تتكتلنا مع بعض،
تصارت الناس ما تحسب إلنا حساب..
من تفركنا، وكلت حيلتنا،

الاسم القديم لمعبر رفح البري

لبكلهم^١ المصريين يعملوا فينا أكثر من هيك.
 زمان كان العبور سرح مرح للي إلو خاطر..
 يطلع.. يطلع..
 ومكانش حد يدكك، كانت لنفوس طيبة..
 ومكانش في هالأمرض تبعت اليوم
 تتحتاج مصر ودكاترة مصر،
 ولا كان في أنفك^٢
 وكنابل وعمليات سخام.
 كانت الناس إذا اشتاكت لبعضها
 تروح عالسلك وتكعد تسلم على حبيبها بالصوت.
 الكرايب إالي بمصر يوكفو بالجهة المصرية،
 ويلاكوهم كرايبهم بجهتنا، برفح الفلسطينية.
 كان ييجي سيدك يوسف، سلفي^٣،
 هاض كان عايش هو وسيدك حسن في العريش
 بعد النكسة^٤ إالي نتكسناها،
 ونشوف بعض، ونسلم على بعض.
 وهالدفة^٥ المصري واكف ما يتخنفس^٦.
 وإالي إلو لازمة يروح على مصر
 يمزط مزط^٧، محد يخرفو.

يحق لهم	١
الأنفاق التي حفرت تحت الأرض ما بين رفح المصرية ورفح الفلسطينية على الحدود	٢
أخ زوجي	٣
حرب ١٩٦٧	٤
الجندي	٥
يتكلم	٦
يمر بسهولة	٧

ولا في جواز سفر ولا تفتيش،
بس بين هالهوية ويمرك.
كانت الناس نيتها الشوك، وتشوف بعضها،
لا بنكلو مصاري، ولا بنكلو صواريخ ملطمين كنا^٢.

١ نقود

٢ مساكين



بدنا نرجع يا ستي

- خطرة خرفتنا أمي إنو كاين زيك^١
أرض أبوها كوينية^٢
للخواجهات اليهود،
وكاين واحد إسمو حايم،
الله يحيمو حمرة تحمرو^٣.

- ستي شو يعني كوينية؟

-
- | | |
|---|------------------------|
| ١ | بجوار |
| ٢ | معسكر لليهود |
| ٣ | تتمنى له ان يسخط لحمار |
- ٩٠

- أنا عارفة يستي!
هيك كانو يكلو عنها
مكان بتللمو^١ فيه اليهود.
كال جاي زمان، من وأمي زغيرة^٢،
وماخذ من لنكليزي^٣، هذاك تبع الهنكر^٤،
عكد للمزارعة في الأرض
إلي زيك أهل أمي بكلنسوة^٥،
تيزرع ويكلع.
أمي كلتلنا إنو جاي من مكلع الله،
من هذيك البلد، الله يقطع اسمها، بالونيا.
ومعو هالمرا أم وش منمش،
زي غرابة البين^٦،
كاينة ترطن يا ستي رطن،
إشي عبراني، وإشي إنكليزي.
وستي ولا كاينة تفهم منها إشي.
تجاي خالي أبو صلاح،
يعرفلو شوية إنكليزي
من أيام مشتغل بالسنتيشة^٧
كلها لستي:

١	يتجمعون
٢	صغيرة
٣	الجيش البريطاني
٤	المكان الذي يسلمون فيه المواد التموينية
٥	قرية فلسطينية في المثلث
٦	سليطة
٧	مكان لتوظيف العمال العرب في وكالة الغوث

هذي بتضل تَكُلِّك متخفيش،
إحنا مصيرنا نرجع من مطرح مَجِينا..
وإنو الصهيونية^١
هي إالي جبرتهم ييجو عبلا دن..
بس هُهم مش كبلانين..
مش كبلانين وبدهم يرجعو...

- وإحنا كمان يستي..
بدنا نرجع..
مصيرنا نرجع...



بلدة يـبـنا^١

- إيش المناسبة يستي؟

بعـتـلي كـُـسـة^٢ مـبـارح المـسـا؟

- مـهـو يـسـتـي مـبـارح كان عـيـد مـيـلـادـي..

١/٢١ .. بـنـاقـي، بـيـسـان و جـنـين،

بـدـهـنـش^٣ غـيـر يـشـتـرن كـيـكـة

١ يـبـنا هـي قـريـة فـلـسـطـيـنـيـة اـحـتـلـت فـي ٤ يـوـنـيـو/حـزـيـران ١٩٤٨، تـقـع فـي مـحـافـظـة الرـمـلـة و تـبـعـد ١٥ كـم جـنـوب غـرب مـديـنة الرـمـلـة، تـرـتـفـع عـن مـسـتـوى سـطـح البـحـر بـمـقـدار ٢٥ مـتـراً، و تـعـتـبـر هـذه القـريـة مـن أكـبـر قـرى قـضـاء الرـمـلـة و هـي أكـبـر ما تـكـون لـلـبـلـدة مـنـها لـلقـريـة، قـدر عـدد سـكـانـها سـنة ١٩٤٥ بـ ٦٢٨٧ نـسـمـة، و حـوا لي ١٥٠٠ بـدوي يـعـيـشـون حـولـها

٢ كـيـك

٣ لـا يـرـغـن

ويعملن زبيلة^١ وزمبليطة^٢.

- إيش بتكول بنتك هذي الطرمة^٣ هه؟

- بتقلك هو أبوي وين نولد والساعة قديش؟

- تعالي جاي عندي يستي.. بسمعكيش منيح أنا.

أبوكي يستي نولد برفح الساعة ثنتين الفجر.

همه دار سيدك كانوا سكنين بمخيم الشابورة^٤،

بس مخيم الشابورة مكش فيه صحية^٥،

الصحية كانت بمخيم بينا^٦.

- إيش يعني صحية يابا؟

- صحية يعني العيادة تبعت الوكالة يابا.

- وهم مسميين المخيم على إسم بلدة فلسطينية؟

- مهو يابا رفح كبيرة مش زي دير البلح،

فيها أكثر من مخيم، فيها ثلاث مخيمات،

١ زفة

٢ حفلة

٣ نتوء في وسط الشفة العليا مما يجعلها تسرق بعض الحروف أثناء الحديث

٤ مخيم للاجئين في مدينة رفح جنوب قطاع غزة، من أكبر مخيمات اللاجئين

٥ مستوصف صحي

٦ مخيم للاجئين في مدينة رفح جنوب قطاع غزة، أكثر ساكنيه من قرية بينا

أكبر واحد فيهم مخيم الشابورة،
وبعديه مخيم لسدود^١.
وبعدو مخيم بينا جنوب رفح،
قريب للسلك إالي بفصل بينا وبين مصر.

- ولك إنت بدك تكعد تحكي للبنت خرايف^٢
وأنا كاعدة، متستحي على دمك!!

- البنّت بتسألني يستي..
خلص يابا.. إسألني ستك تسألنيش أنا.

- إسأليني أنا يستي، أبوكي هاض جاهل،
بعرفش إشي!!

مخيم الشابورة يستي أكثر سكانو
من بلدنا، من زرنوكة.
ولسدود كل سكانو من لسدود.
ومخيم بينا سكانو من كرية بينا.
تنهم هاجرو توزعو على القطاع،
بس أكثرهم سكنو بمخيم بينا، لهيك
سموه مخيم بينا.
وفي منهم بمخيم الأمل، بخانيونس..
وفي بالوسط وبالشاطئ وبالشمال كمان.

١ مخيم للاجئين في مدينة رفح جنوب قطاع غزة، معظم ساكنيه من مدينة أسدود
المهجرة

- هم يستي دار مين من بينا؟

- والله يستي عوايل بينا كثار كثار..
إيش بدي أعدلك تعدلك.. خذي عندك..
بس وأنا بحكي وعائي.. تكطعنيش..
تني أكرلك 'إياهن كر..
دار دوحان، المجدوب وعوض الله..
أبو جراد، الخطيب، أبو نحلة، إبراهيم حسين..
أبو هاشم، الهمص، الطويل، العطار..
أبو جلالة، أبو أمونه، أبو عون، النجار..
العكر، الرنتيسي، البهناوي، اليمني..
عبد الحافظ، أبو حسنين، العيلة، أبو سليم..
الأسمر، أبو مطر، أبو الفاخ، أبو سالم..
أبو معروف، سلامة، موسى، العبسي..
البوجي، جاد الله، حميده، أبو حشيش..
عواجة، سعيقان، عباس، دعسان، داود..
أب وعساكر، البيك، أبو علوان، مصران..
العاجز، الدووة، زيغان، خليفة، أبو لبدة..
السماك، نصر، الجرو، الشريح، هليل..
محمود خليل، نطاط، أبو مرزوك، سويس..
طافش، حسنين، أبو عبيد، أبو يونس..
عبد الوهاب، حمد، دعبس، أبو سعده، ياسين..
يحيى، حنيف، النوري، بهلول، أبو حجاج، وحجاج..
حسن يوسف، كله، المغير، حرودة، بركات..

الكاضي، البشيتي، المغاري، هباب، الجزار..
عبد الكريم، أبوهاشم، جراد، فحجان، أبو محسن..
درويش، الجمل، طه، فايد، أبو عزة، أبو خوصة..
الوديدي، موافي، أبو سويرح، الشريف، أبو شريف..
شريف، بكرة، الصرغندي، الوليدي، أبو طكية..
العسوة، أبو بطنين، أبو سويلم، الزطمة..
السعدوني، الطنطاوي، الجوراني، عاشور..
أبوغالي، طشطاش، أبو يوسف، رويشد..
شلايل، ديب، أبو حماد، الرخاوي، البكة..
السبع، سخيل، أبو حمرة، زلوم، القططي، والعريني...

- يابا هو في عائلة عريني بينا نفس اسمنا؟

- بعرفش أنا يابا. بطلعليش أحكي وستك قاعدة..

- لا إحكي... إحكي منتو جيل بطل.. عندو حيا..
لزعير بحكي بتم لكبير...

- إنتي الخير والبركة يستي
ربنا يديك فوق روسنا
جاوي البننت... ولأ!!

- أنا إالي بجوابها. إسمعي يستي
بيننا وزرنوكة بينهم سكة حديد
هية هية العيلة، بس تفر كنا على مشاكل الأراضي.

الله يسمحهم كبارنا، بكيو يتخانكو على الأرض
تنها راحت كلها.. مضلش لا لعريني بينا أرض،
ولا لعريني زرنوكة أرض.
تنهم أخذوها اليهود كلها.

- يعني يستي بينا وزرنوكة جمب بعض؟

- آه يستي من بينا وشركة علطول يمك
بتيجي زرنوكة، كانت بينهن سكة حديد،
بتروح على الكدس وعلى يافا، ويتمرك من اللد،
وهي رايحة وبتيجي جاي تنها تصل غزة.
وشركها كمان مغار ولكيبية،
ومنها وغربة البحر يمك بس بدك
تمشي بكروم العنب تنك تصلي البحر،
ومنها وشمال، النبي روبين وتل أبو سلطان،
ومنها وكبله بشيت وكطرة ونهر صكير
والنبي يونس، وكان يستي بينا جامع كبير
لأبو هريرة، الله يرضى عنو،
وبيوتهم من حجر، بتلاكيهن بيض ومصفوفات صف
بزيك بعضهن، وزراتهم كروم كروم
واسعة وبتشرح الكلب، إشي عنب وإشي جوافة
وفواكه من كل الأشكال والأنواع وإشي موز.
وخضرة كد مبدك، وحكول هالكمح.
وكانت زمان زمان بينا مينا يستي، كبل مينا يافا.
وتنهم هجروهم اليهود ولا كبل.

في إلهم قصة بتفرط من الضحك..
لمنو كايئة معسكرات لنكليز
إجو الينوية بدهم يسرُكو المعسكر.
كامو ملكيوش إشي يخذوه..
سحبوا الخيمة سحب، ولفوها لف، وحملوها..
لهمة إيش لفين فيها؟ عسكري إنكليزي!!!
وصارت زيطة وزمبليطة مع لنكليز تنها خلصت،
وتنهم هاجرو، زي عملتنا يمك بالزبط..
باكية اليهود تكصفهم كصف بالمورتر،
والطيران، تنهم نزلو على المجدل والجورة..
وبعدينش إجو جاي على غزة،
وعكد ما كدرو كاومو وجهزو حالهم.
اسمعنا إنهم بايعين ذهب تنهم مجهزين حالهم،
وشاريين بوريد وسلاح.
والجيش المصري منسحب..
تنو مدشرهم. الينوية عملوا إالي عليهم يستي
وتتَكبوا زي بكيت لبلاد.
تنهم سمعوا بمذابح دير ياسين،
وبيت دراس، إجو شارددين
بحالهم ومالهم وعرضهم.
وهذي هي قصة بينا.
أبوكي بعرف يكرلك إياها كر زِيي هيك يستي؟
- لا يستي مهو إنتي قد أبوي خمس مرات.

- خمس مرات يا بنت الرضي.



بلدة بيت طيما^١

- ستي الطموية ليش مخوخهم صعبة؟
وشقفه وحدة؟
معنهم من جواً طيبين وخدمين؟

- كل الناس يستي خير وبركة
هَيهم جيراناً من الهجرة:
سلمان، وعواد، وصباح،
والكرد، وعيسى، وأبو لبدة،

١ بيت طيما هي قرية فلسطينية في قضاء غزة، وتقع ٢١ كيلومترا إلى الشمال الشرقي من غزة وحوالي ١٢ كيلومترا من الساحل. أنها تقع في أراض سهلية على السهل الساحلي الجنوبي لفلسطين. وقد هاجر سكانها سنة ١٩٤٨

والمبحوح، وسلامة، وجبرين،
والشريف، وحسين،
وأبو الشعر، والثلباني،
عمرنا مَشْفنا منهم غير كل خير.
همة يستي حزكين
زيادة عن اللزوم، إنت تخبطش
على طرفهم، من كثر طيبتهم بتراث فيهم...
يبي محسنهم ولا أحلاهم
باللي بخبطش إلهم على طرف.

- طيب هو ليش سمو بلدة بيت طيما
هالاسم؟

- هاض يستي كانوا يكلو
زمان كال في نبي ولي،
إنو رجل صالح إسمو تيما.
هيك سمعنا، لا كرينا كتب، ولا تسكفنا.
كاين ساكن أول واحد بالبلدة
من كديم الزمان.
بيت طيما، يستي،
من غزة وشركة لشمال شوية،
وإنت طالع من غزة،
مزوي زوي^١ تلا^٢ الخليل،

١ تتجه في زاوية

٢ ناحية

بدك تمرك على هريا وبيت جرجا
وبرير تنك تصلها.

ومنها ولغاد، ورآها يعني..

بتيجي كوكبا، والمجدل،

وبعدهن على طول جولس

والحليقات والجية

ملازكات فيها لرك يمك...

وحدة شركها، ولآخرة إالي هي

الجية غريبتا، على طول،

والله ما يعيني عالزلال، فيها

ثلاث خرب: خربة بيت سمعان

وخربة أرزة، وخربة ساما.

وهاض ساما كانوا يكلو إنو نبي

وله رجل صالح زي عملت

سيدنا الخضر.

وعزمت إالي شافوا، كال

في أرض واسعة وكبيرة

مرصوة بإلي، يكطع اسمها، الفسفس.

هذي إالي بتكون شكف بلاط

صغيرة، ولك شو إسمها؟

- الفسيفساء يستي.

- ههههه أيون هذهي.

يكطع شرك كيف حافظها هذي
يعمي العلم نور بدبك^١ بالعكل.
وعلى سيرة العلم كال كينالهم
مدرسة وحدة همة والحليقات
وكوكبا، ثلاثتهم شركة فيها.
أغرب شغلة سمعتها عن بيت
طيما يستي، بلحة...
كانوا يكلولوا إسمها «كطعت النبي».
بلحة طويلة يبي مطولها.
إنت يستي بتكلب المواجه
عالواحد وبتحرك كلبي
كل متجيلي سيرة بلد من البلدات.
تنهم هجمو عليهم اليهود
بحيات أبويا خرف إنو أهل بيت
طيما كطعوا راسين يهود اثنين
كينين يكايدو^٢ فيهم،
من عند الكبنية^٣،
ويكلولهم ذبحنا النسوان بدير ياسين^٤
وخرفو كمان كاينين في بيت طيما
فدائية من مصر وسعوديين
وكاومو أهل بيت طيما يستي عكد مكدرو..

١ يلتصق

٢ يقهروهم

٣ معسكر يهودي

٤ دير ياسين قرية فلسطينية تقع غربي القدس، دخلتها العصابات الصهيونية المسلحة يوم

٩ أبريل/نيسان ١٩٤٨، وأقاموا فيها مذبة بشعة بقيادة مناحم بيغن

بعدين نزلو عالمجدل ومن المجدل
تنهم إجو هان عالبريج
ودير البلح، وتوزعوا بمخيمات غزة،
وكانت زراعتهم كروم وكمح،
وهالجميز والخروع والخشخاش عحفاف البلدة.
الطموية على سلامتهم يستي أحسن ناس بس بدك تتفهملهم.



قرية الجورة^١

- مبروك لطرميل^٢ لجديد يستي.
والله زي تبع الوزرة، هاض أسمر وحلو.

- الله يبارك فيكي يا ستي،
همه الوزرة أحسن منا؟
أول طشة فيها إلك إن شاء الله..
يلا حضري حالك.. بدي أطششك على البحر...
من أوله لأخره، نطول نطول..
إيش بدك يستي نقبل وله نشمل؟^٣

١ الجورة قرية صغيرة تقع على الساحل الفلسطيني، احتلها اليهود بتاريخ ١٩٤٨/١١/٥

٢ السيارة

٣ نتجه جنوب أو شمال

- والله يستي المثل بـكول: شمل سنة ولا تكبل يوم.

- توكلنا على الله ها وهي تشميلة.

- شامم يستي ريحت بحرنا محلاها!!
منيح إيلي خلولنا إياه اليهود ومخدهوش..
ضلك ماشي تنك توريني عسكلان الجورة..
أوعاك توکف...

- وين إحنا!! أو ين عسقلان!! يستي..
لسه مطولة، هذي آخر القطاع بعد بيت لاهيا.

- ولك إنت بدك تعرفني بعسكلان الجورة؟
عرفيتها بالنتفة. إحنا أول ما هجرنا
نزلنا فيها.. تنا جينا لجاي على غزة.

- عسكلان الجورة يستي...

- ركز بسواكتك إـتـظـلـكـش ' تطلع في
وأنا بحكي.. سامحيتك متطلعش..
بس إنت ركز بسواكتك بلاش تموتنا فعص.

- مش إنتي إيلي بتظلك تقولي
لمني أحكي أطلع في..

قَلَّتْ حيا إِلي بتطلعش في الواحد إِلي بحكي معو!

- وَلَكْ مْكُلنالك سمحيتلك..

مشان لسواكة..

وين كنا؟

- كنا فعسقلان الجورة...

- أيوه عسكلان الجورة منها وغربة

البحر، فش إلها جيرة غيرو،

وإنت جاي عليها من الشمال.

بتحدها حمامة ومنها وجنوب

كبل بيت لاهيا، يستي، الخصاص

وهربيا ومنها وشركة يمك بالزبط نعليا،

ومن نعليا وشرك شوية بربرة والجية.

كل هذول كانو ييجو يصيفو

ويشترو سمك وسلال من الجورة،

وأهل المجدل ينزلو يشترو السمك.

كعدنا نتفة منيحة بالجورة،

كبل منيجي على غزة،

لمنهم هَجَرُونَا المنكوين

على حبة عينهم اليهود.

هدهو! هدهو! وصلنا يستي شايف؟

هذول العواميد إِلي كالو عنهن..

عملوهن اليهود بالجورة.

- عواميد إيش يستي هذول؟
هذول يستي محطة كهرباء،
بولدن كهرب لليهود. إستني..
خليني أصف على الثلة هذي..
خليكي تشوفي منيح.

- هذ المنطقة اسمها السودانية يستي..
تابعة لبيت لاهيا.
شايف يستي والله كنو الهوا
إلي هناك غير.. والعصافير غير..
وحتى السما غير...
يخييتي علينا كيف هان علينا ندشر هلبلا.

- عارفة يستي أهل الجورة؟

- عن تجربة بحكيلك أحسن ناس
وفهمانين، وأكثرهم متعلمين حساب ورياضيات
مهو من أكل السمك يستي
بتلكيهم ذكيين، وعكولهم منيحة.
أوادم أهل الجورة، يستي، أكثرهم
كانوا جيرانا فيالمخيم، بس هم
ساكنين منا وفوك، بحبوش
غير يسكنو على البحر. شغلهم
وعملتهم البحر. أول مهاجرو اختارو

جيرة البحر على طول يمك
بمخيم الشاطئ وبدير البلح وبخان يونس،
وفيههم شوية بالنصيرات،
كليل متلاكي جورنية سكنين
بالمخيمات الشريكة. عوايل الجورة
كثار يستي إيش بدي أعدلك تني أعدلك:
صيام والهباش وأبو مهادي وأبو غوش
وكنن والعبد حسين وعلوان والبردويل
والمسحال وحسونة والجعبري والزاحوك
ومطر والشيخ علي وغراب وزريد كوصة
وأبو سلمية وبلحة وأبو دراز روكه وأبو زاهر
والهليل وشريم والنجار وياسين والدكران
وحلاوة وأبو جحجوح والطويل والكصير
وشحادة وحامد وعاشور وبصلة وعياش
وهنية وكباجة والحناوي وراضي وفرحات
وندى وثنية وحجو وأيوب والزك والعمودي
وروكة وبخيت وأبو دية ويونس وسالم
والعمصي وأبو غليون والكهوجي والشعراوي
وأبو جياب وأبو شكة والأخرس وحجازي والسلفيتي
وسحويل ورضوان والجمال وبحر..
كديش عديتلك يستي تنك زهكتني!!

- ثلاثة وستين عيلة بالزبط يستي أنا مركز معك.

- بلكي نسينا حد... يسامحنا.

- طيب يستي هم الجرنية مكنوش يزرعوا؟
بس على صيد السمك؟

- له يستي! مزارعين أحسن ما يكون..
هالتين والجميز والعنب كروم كروم
وخضرة كمان، أرضهم صالحة لزراعة،
ومحاصيلهم كانت تلف لبلاد.
وكانوا كمان يصنعوا ويغزلوا عدة الصيد
لعكا وحيفا ويافا، ويبيعوهن بسواكهم...
وكانوا يسوولك هلسلال من الكش..
يبي محلاهن.. ولأ الكراسي الكش!!
والجورة يستي، عسكلان الكديمة، كانت كلعة
لكل الملوكة إلي إجو على فلسطين..
من أول واحد، لحد عمر ابن العاص
وصلاح الدين وغيرهم...
كانت فيها تمثيل كثيرة وأثار... يبي كدش
بتلكيهن وين مجا بهالحراش.
لهيك كانوا يجوها المسيحية
والسياح من كل الدنيا.
ولمنهم هجروهم اليهود، منزلوش عالجورة نزول،
كانت المجدل سكطت، وطبو بالجورة كصف
بالطيارات، وأهل الجورة كاومو على كد مكدر..
وبعدينش أجو جاي على مخيمات غزة.

والله يستي مالي خاطر أروح بدي أضل
اتطلع بهالحدود مع هالحسرة.. بس هدهي
أغربت يستي خلينا نصلي المغرب..
ونرد نروح..
بس هتلي طرمبيلك
على الكيلة
تني أصلي وأنا كاعدة.



قرى بطاني شرقي^١ وغربي^٢

- ستي بدي إياك تجيبلي أكم من طوبة
وتسكري الأرض من غربة
بجينا منها همان^٣ وبلاوي يستي..
بتعرفلكاش بنا يينيلنا إياها؟

- ولا يهمك يستي البنين كثار..
من قُلَّت الشمينتو^٤ كلهم قعدين..

١ البطاني الشرقي قرية فلسطينية احتلت ودمرت سنة ١٩٤٨ خلال عملية باراك في مايو/ أيار، التي استهدفت في البداية قرية بيت دراس، أكبر قرى المنطقة. بلغ عدد سكان البطاني الشرقي ٦٥٠ نسمة في سنة ١٩٤٥

٢ البطاني الغربي قرية فلسطينية احتلت ودمرت سنة ١٩٤٨ خلال عملية باراك في مايو/ أيار ١٩٤٨. بلغ عدد سكان البطاني الغربي سنة ٩٨٠ نسمة، وقدر عدد أبناء القرية اللاجئين سنة ١٩٩٨ حوالي ٧٠٠٠ نسمة

٣ ثعابين

٤ الأسمنت

بس هاتي خرخشي^١...

- خرخشك أبو زنيط^٢...
إنت جيب الطوب.. وأنا بالدينار بدفعلك.

- له يستي أنا بمسخر معك...
ستي هوا مين أبو زنيط هذا؟

- أبو زنيط يستي مرض،
كان ييجي بالدواب زمان..
اليوم أبصر شو سموه.
مرض بخلي الدواب تصير تضبح ضبح^٣
وهاض بعدي يستي، بعدي البنادمين كمان.
كان في واحد بكريّة البيطاني،
بكلولو أبو زنيط، هالمرض صابو،
وصارت الناس تتحاشاه، ومتكربش منو،
تنو زهك حالو وراح سكن هو وعيلتو
تلة كرية بركة، هذي شرك لسدود.
وعاش هالزلمة أكثر واحد في كرية البطاني.
تنهم ماتو إلي بتمسخرو عليه، وهو ضل عايش.
والناس إلي تستحي منو يكلولوا عنو أبو ضباح.
ضلو عايش تكبرت عيلتو وصارت البطاني

١ إظهار النقود

٢ مرض يأتي من تراحم الدواب ببعضهم البعض، يشبه الجرب. كان يقال عنه أبو زنيط

كناية عن الازدحام والتدافع، وقيل إن أبو زنيط اسم ضفدع

٣ تسعل

بدل مهبي وحدة ثنيتين: غربي وشركي.
الغربية بتحدها من شركة ياسور،
والبطاني الشركي وبتحدها من غربة لسدود،
ومن شمال بركة «برقة» ومن كبله «الجنوب»
بيت دراس، والبطاني الشركية بتحدها
من الغرب البطاني الغربي ومن كبله
بيت دراس أخرة مرة، وبيار تعبية.
ومن شركة بتحدها الكسطينة، ومن شمال ياسور...
إنت ولك بدك تخذني بتوكة؟
بدك تجيب الطوبات ولا لا؟

- سبحان الله يستي لتعرفي
من وين بدي أجيبك لحجار؟

- من وين بدك تجيبهن؟

- من صاحب إيلي بطاني، إسمو حسن مسلم أبو أنس.

- هاض إيش بكرب للمختار بكر مسلم؟

- على ما أظن بكر بكون عمو، الله يرحمو.

- جماعة طيبين هذول يستي مسلم
من البطاني الشركي.

- اتضلكاش كل مسألتك عن حد تكلي مات يستي...

- أنا بقلش مات، بقول الله يرحمو.

- إيلي خلف ما مات، الله يرحمو ويرحم جميع خلقو.

خلص مزالو مسلم وبطاني طمنتني.

بكونن طوباتو مناح وكويّات.

هذول البطنية أهل ذمة وبغشوش.

- هم يستي البطنية قريتين مش قرية وحدة؟

أول مرة أعرف!!

- ولك هو أنا إيش كاعدة بكلك من الصبح؟

كرى البطاني هذي كانوا يكلو

إنها كاينة جنة، وكاين الخليفة معاوية

ابن أبو سفيان مهتم فيها وعملها

إلو زي كأنها عزبة ولا ضيعة.

فيها هالحمضيات والفواكة وكروم العنب

وأكثر كريتين فيهن بيار ميه.

وميتها حلوه على زمت^١ إيلي ذكوها.

وهالجوامع كاينات زمان إيلي عملهن معاوية.

وبيوتها كانت نصها حجر ونصها طين،

مسكوف بالخشب والكصب.

بس الغربي كانت عمرانة أكثر،

١ شهادتهم

لأنها كريمة من لسدود.
وكنلهم للبطنية مدرسة وحدة، في النص يمك
بين الثنتين. والبطنية يستي بتعرفهم:
أبو دان ومسلم ومصلح والخضري
وحمودة والصعلوك والبطريخي وكاسم
وأبو زنيط وأبو سرية وأبو الدم والسكران
ومنصور وكنديل وخلف والهنداوي
وموسى وحمدان والسكني ولكطاطي
والضبة والبربار والبطريخي وأبو علي،
وإلي نسيئو نسيئو...
وتنهم اطلعوهم وهجروهم اليهود
كالو صائرة عملية اسمها براك^١
على اسم إلي يكطع أسمو تبعهم..

وتنها صائرة مجزرة بجمبهم في بيت دراس..
صرتلك مجزرة كبيرة خافت الناس
وأجت جاي على غزة وكعدو أكثر إشي بمخيم لبريج،
والنصيرات والمغازي، وفي شوية
مسلم برفح كانوا بالشابورة.
ولك أكلتلي راسي كوم روح لمسلم
صاحبك خلينا نخلص من هالطلبة
وله دك عليه من هالأغبر^٢، هالتلفون إلي معك.

١ عملية براك استهدفت القرى الواقعة جنوبي الرملة وغرب ومن ضمنها قرى بيطاني

٢ كناية عن عدم الوضوح والمعرفة للشيء من كثرة التظليل أو الغبار



قرية جولس العسقلانية^١

- ولك يستي طول الليل وأنا سامعة المية.

عندك بدش^٢ كنو في بربيش مبعوط؟

- الله يصبحك بالخير يستي...

لا، هاض حوش دار القرماني، بربيشهم المبعوط^٣

١ مدينة جولس تقع شمال شرق مدينة غزة، وتبعد عنها ٢٦,٥ كم، وترتفع ٥٠م عن سطح البحر. وتبلغ مساحة أراضيها ١٣٥٨٤دوفا، وتحيط بها قرى السوافير، عيوس، المجدل، وقدر عدد سكانها سنة ١٩٢٢، (٤٨١)نسمة. وفي سنة ١٩٤٥(١٠٣٠)نسمة. ويوجد بها جامع، مقام الشيخ خير، وهو مجاهد في الحروب الصليبية، وأنشأت مدرسة القرية سنة ١٩٢٧. كما يوجد بها آثار قديمة، وخربة الذراع، وخربة رسم الفرش. قامت المنظمات الصهيونية بهدم القرية وتشريد أهلها البالغ عددهم سنة ١٩٤٨ (١١٩٥)نسمة، وكان ذلك في ٢٨ / ٥ / ١٩٤٨. وبلغ مجموع اللاجئين من هذه القرية سنة ١٩٩٨ حوالي (٧٣٣٧)نسمة. أقيمت على أراضيها مستعمرة هوديا سنة ١٩٤٩

٢ دش أحد أصوات الماء كناية عن الدوش

٣ معطوب

- طيب إحكي معهم يستي والله حرام وخسارة.

- صبحت من الصبح اتصلت وحكيت
مع أبو أحمد نصار، رئيس البلدية،
والراجل محترم وتجاوب، وقلي شكراً إلك
ألان ببعث تبعين التصليح.

- هاض نصار جولس يستي؟

- آه يستي من جولس.
هاض كان صاحب أخوي حسني
وزميله بالمدرسة..
صاير رئيس البلدية، مشاء الله.

- أهل جولس جماعة أوادم،
ودار نصار بالزات طول عمرهم
جيراني بالمخيم ولا في أحسن منهم طيبين.

- ستي هم أهل جولس أكم عيلة؟

- مالك يستي فيهم البركة!
عندك: أبو خضير الشريف وأبو عيشة
وشكلييه والشبراوي والعصار، هذي العصار
أكبر عيلة بجولس إلها ربع لحالها.

وعماد الدين إلهي همَّ عماد
والعمري ومحمد خليل والمصري ونصار
والنكلة والغصين ورشيد وحسين وعزات
وأبو سيف والناجي وأسليم ومصطفى
وعرمان وبدوي وأبو عويضة وعابد
وكراجة والغمري وعنبر والحوث والقطار
والطيّار وشتات وخطاب.

كان يستي بجولس زلمة مجاهد
حارب الصليبيين وغلبهم كانوا يكلولو
«النبي خير» بس هو أسمو الشيخ جبر.
ضلت الناس تزور كبرو،
لحد الهجرة، من بلدات ثانية.
وكانت جولس متقدمة أكثر وحدة
وفيها هالداكاين^١ بنص الكرية،
تشتري منها كل حاجة.
وكانوا يكلولو فيها بير مية كبير
إلو اطنعشر عين، أربعة للدواب، وثمانية للناس.
وجولس يستي بتّوهش، من المجدل وشركة
يمك المجدل غربها بتيجي وحمامة بتحدها
بعدها من غربّة ومن الشمال عبّس
والسوافير الغربية وشركها يمك نكبا.
والمجدل بتلفها لف بتكون بالمجدل
وبتفكر حالك بجولس، لهيك كالأو
عنها جولس العسكلانية.

لنو من تَلَثَّ شَكَاتَ بَتَحَدَها المَجْدَل.
ولا هنه أربعة، من غربة ومن كيلة
وشوية من الشمال ونتفة من شركة.
وجولس يستي بلدة كديمة، يايي، مكدمها.
من أيام الرومان فيها لليوم عواميد،
هالرخام البيض، وهالبلاط بتلاكيه بكل شكة
تبع لكصور الكديمة، وفيها خرب كثار..
خربة صند حنا هاض واحد مسيحي..
وخربة وادي البيار، سموها هيك من كثر لبيار
إلي فيها، وخربة الذراع وخربة الفرش،
كان فيها بيار زيت للتخزين بכולوا،
وخربة بزة وخربة المنايا، هذي صار فيها حرب
مع صلاح الدين، وخربة أم العدس،
كانت هالخربة متزرعش غير العدس
فيها مكبرة وفيها كبر الشيخ جبر
والشيخ زيدان، وعوادي الجبل بتلكيلك
هالجسر الكديم مخرمش خرمشة
بعد منسفو كائد كانو يكلولو الافريكي
بحرب الثمانية وأربعين
ليمنع اليهود يمركو منو بصلحش تمشي فوكو.
وبجولس يستي في ست وديان معروفات:
وادي البيره ووادي البيادر والوادي العميك
ووادي أبو عنيبه، بظل ماشي ليروح على بيت دراس
ومنها للبحر، ووادي لعظام وآخر وادي وادي الجبل.
وكانت جولس يستي حارتين:

حارة غربية اسمها حارة خطاب،
وكالو عنها كمان حارة المصريين.
وحارة شركية اسمها حارة العصار.
والله وكالوا يستي إنو ربع خطاب
أصلهم من آل عمر ابن الخطاب، الله يرضى عنو.
وكالوا أبو عيشة والغصين ولطيّار والعصار
منال البيت الأشراف، وبكيت أهل جولس
من آل البيت، من ولاد علي، الله يرضى عنو،
ابن عم الرسول عليه ألف صلاة وسلام.
وبيوتهم حارات يستي مصفوفات صف..
زيك^١ بعض. بتلاكيهن من الطين
والشمينتو، وبيض ويبي محلاهن.
وبزرعو بساتين جميز وكروم عنب
وفواكه وكمح وعدس. فلاحين زي عملتنا
بالزبط يمك. وتنهم هجروهم اليهود
إلي منهم كانلو دار ودارين برام الله والخليل..
وبجولس كرييين بعض كانو يكلوا
في جوالسة بالخليل من حلحول
تنها صارت الهجرة كاينين غاد، وضايدين
غاد، مش جاينين زي بكيت أهل جولس على غزة،
ومن المجدل لبيت حنون..
تنهم جاينين جاي على غزة..
وتوزعوا بالمخيمات..
وهدي هي كصت جولس والجوالسة.



قرى المسمية^١

- مين هالزلة الكيمة والسيمة أبو عكال،
إلي كاعد معكو بالحكورة إنت وخالك يستي،
تنو صوتو طالع؟

- هاض «المختار أبو حمادة مهنا» يستي.

- إن شاء الله بتنحل هالمشكلة ومبتكبرش.

- الحمد لله أبو حمادة حلها بشربة قهوة.

- شربة الكهوة عزلام غالية يستي..

المسمية الكبيرة هي قرية فلسطينية هُجر أهلها في نكبة ١٩٤٨

ولمساح كريم..

بس المعتدي بييجي هو يشرب كهوتنا..

اترحوش انتو قبل.

إلا هوّا ييجي.. هيك الأصول يستي

- مهيك أبو حمادة قال، وهيك بدو يصير بعد المغرب.

- إن شاء الله على خير.. هاض مهنا مسمية؟

- آه من المسمية.

ستي بسمع في مسمية كبيرة وصغيرة.

ههّ قريتين، ولّا قرية وحدة جمب بعض؟

- والله يا ستي أهل المسمية ناس أوادم،

وكتار، تنهم أكثر بلدة فيها ناس وعوايل.

هات كراص هالكشك^١، شمسهن^٢

هان، فردهن^٣ وأنا بحكيلك كصتهم.

كان أبوي يكول، يستي،

إنو أول ناس سكنو بالمسمية

الهورانية، عائلة الحوراني،

وهذول جايين زمان من سورية،

بالزبط من مدينة اسمها درعا، زمان زمان..

١ دقيق قمح مجفف مع اللبن

٢ وضعه في الشمس

٣ وزعهن

وعائلة مهنا من أكبر عيل المسمية،
كنتلهم قصة بتنكال إنهم حجازيين بالأصل
ومسويين حرب مع قبيلة عربية
بالحجاز، وتنهم جايين صايرة معهم عركة
مع الزهارنة بالمسمية،
وتنهم غالبين الزهارنة ومسيطرين
على المسمية كلها.
هو يستي المسمية الكبيرة،
مش بعيدة عن المسمية الصغيرة،
ملزكات إبعضهن، بس هديك
سموها لكبيرة لكتر عويلها.
وأهل المسمية أهل كرم وطباع حميدة.
كاين عندهم بالبلدة ست مضافات،
تضيفو الناس ويستكبلو عابر السبيل والتايه.
وكان خالي يحكيلنا إنو كاينة مدرسة زراعية بالمسمية.
وتنها صارت الثورة كبل الهجرة
كنتلهم صولات وجولات.
أكثر واحد كان أبوي يجيب سيرتو
تنو كايد الثوار عبد الله مهنا،
وگنتلهم يستي دبكة^١ خاصة اسمها
«الصحجة»، هيك زي الكفز،
مشهورين فيها بعراسهم.
يكونو الشباب حاملين ل سلاح ولسيوف
وينطرو نطر، كفز يكفزو، مع شوية دبكة،

بتشبه دبكتنا العدية.
المسمية يستي بتوهش عنها:
بين يافا والرملة مش بعيدة عن زرنوكة.
وعويلها يستي كتار، إيش بدي أعدلك تعدلك خذ عندك:
أبو حية وأبو العطا وكرارز وثابت
ودياب والبغدادى وشاهين ومطر
والمزين وأبو لشين وسيف وهدهود.
إيش بدي أعدلك يستي مشاء الله بنخلصش.
وهاجرو كل هذول، يستي، وكامو بالمسمية سبع مستعمرات.
كانت بيوت المسمية يستي طوب وحجر ومزبطات^١.
وكان فيها خربة اسمها خربة «السلوجة»، هي كديمة أثرية.
والمخترة أكثر إشي كعدة مع الحورانية هيك سمعنا.
شايف الشمس راحت عن الكشكات، إلحكها، إلحكها، هتهن لجاي
وهاي قصة المسمية يستي.



بئر السبع^١

- وينك يا ستي من الصبح محدش شافك؟
صحيح إيلي سمعاه؟

إيش إيلي سمعاه؟

- كال عامل حادث بطرمبيلك^٢ لجديد؟

- آه والله يستي، الحمد لله إجت سليمة.
واحد من دار أبو تيلخ خبط بوز العربية

١ مدينة قديمة سكنتها القبائل الكنعانية، دعت بئر السبع على الأرجح نسبة إلى سبعة

آبار قديمة

٢ سيارتك

بالتكتك ودمرها تدمير.

- المههم يا ستي فش حد انصاب ولا اتضرر؟

- لا يستي الحمد لله.

- معوضة يستي

أوعاك تكون أخذت عوض يستي، أوعاك!

- والله يستي طلع الشب معرفة،

الشيخ حسام أبو معيلق، أبو نواف.

وأبو نواف طيب عليها..

أي هو أنا بستجري أخذ عوض.

- أبو نواف هاض ترباني يستي؟

مسمعاته طيبة، من بير السبع أصلهم.

- هلهين يستي والله أنا احترت بالبدو

كل واحد من أصحابي إلو عشيرة:

إلي ترباني وإلي حنجوري وإلي سويركي وتياها

وأن تلخبطنا بواحد فيهم بزعل وبكشر.

- هذي يستي خريفة يبي مطولها..

كوم ركبلنا عابريك الشاي بهالنععات..

وأنا أكصلك إياها من طكطك للسلامو عليكموا...

- تكرم عينك يستي...

- أول إشي يستي بلزملك تعرفو عن بير السبع
ليش سموها هالاسم.

كالوا زمان كاين فيها سبع بيار مية،
وفي ناس كالت إنو سيدنا إبراهيم، عليه
وعلى نبينا السلام، متناوش

هو وأبي مالك، ملك الفلسطينيين،
وصاحب بيار المية، تنو مزي نعجاتو
من بير فيهن، ولمنه زعل أبي مالك.

وهو بعرفش إنو سيدنا إبراهيم نبي.
أعطاه سيدنا إبراهيم سبع نعجات
تيرضيه. وبهيك صارو يكلوا

عن هالمنطقة بير السبع وسموها بهالاسم.
وكالوا خطرة إنهم بطلوا يكلوا أبي مالك،
تصيرين يكلوا أبو معيلق.

وبير السبع يستي أرض واسعة
ملهاش أول من آخر، ولهيك
سكانها وعشيرها كثار.

خذ عندك واحفظ إذا بتحفظ،
كل عشيرة إلها صف وأتباع وأحلاف.
أنا من خراف أبوي حفظاهم صم' يمك
إذا بنسى حد يسامحنا:

الترابين والتيها والحنجرة والسواركة

لجبارات وغوالي والزريعي والوحيدات
العزازمة وأبومدين والظواهره والحمدات
النصيرات والسعيديون والعطاونة والثوابنة والكطاطوة
والمحمدين والظلام. ويش بدي أحفظ تني أحفظ يستي،
كتار بكلك كتار، إذا كانو يكلولو نص أراضي فلسطين إلهم.
هاض يستي بير السبع، بحدھا من جاي،
من غربة يعني، عراك المنشية والفالوجة وبرير وهوج،
وبحدھا من الشمال وغاد الخليل وجبالها والكبيبة
ودورا وبيت جبرين وشوية من البحر الميت طرفو،
وبحدھا من شركة الأردن ومعها وادي عربية
والبحر الميت أخرى مرة، ومن كبله بتحدھا
العوجا وسينا، وكانو يكلولو بحر العكبة أبو لسانين
ولا شو إسمو هاض زي اسم دول الخليج؟

- خليج العقبة يستي!

- أيون هاض إالي عامل زي علامة النصر..

أصبعين للبحر...

وبير السبع يستي كانوا يكلولوا

فيها خمس كصور ولأ هنه ستة؟

كصر أم بغك وكصر البحيرة وكصر الجهينية

وكصر الثلمة وكصر السر وكصر العجلان،

هاض تبع سيدنا عمرو أبن العاص.

ويبي كديش فيها خرب! تعدش!

خرب وبيار مية وجبال ومراعي كلو راح...

وفيه وديان كثير، أشهر وادي بعرفوه الناس
وادي الملح، وكان فيها سوكة بسموه سوكة البرين،
وكان فيها جامع إسمو جامع عسلوج،
كبير هالجامع، وسكة حديد من أيام العسمللي.
وأفراحهم عالربابة^١ والدحية^٢،
والخيل تلعب وترقص. وتنهم هجروهم اليهود،
زي عملتنا بالزبط، نصهم راح على الأردن
ونصهم أجو على غزة. بس أكثرهم بالأردن،
عأساس الأردنيين بدو وحياتهم بادية متعودين عليها.
ويش كانوا يزرعوا يستي مش غاد^٣ بالزراعة
شغلتهم وعملتهم التجارة بالخيل والحلال ورعي الغنم،
بس كانوا أشطر أشي فيه الكضى.
هم أسياد الكضى يستي فش عندهم...
لا محاكم ولا شرطة ولا جيش..
عندهم كاضي بكضي بينهم بالحك..
بلي برضي الله ورسوله، إشي بشعة^٤
وإشي دموم^٥، وأخطر إشي عندهم الأرض والعرض.
تكربش عليهن بتسلم، بس شو كرم يستي، تعدش،
بس يجيهم ضيف بشيلوه على روسهم..
وبذبحولو الذبايح وهامناسف، وبكصروش بضيفهم.

١ الربابة آله موسيقية لأهل البادية

٢ رقصة فلسطينية للبادية

٣ هناك

٤ البشعة طريقة تقصي الحقيقة، يحرق لسان المتهم بقضيب من حديد أو سكين يوضع

على النار لتوقع القاضي أن ينطق بالحقيقة قبل أن يحرق

٥ قضايا الدم

بيوتهم كانت من الشعر، واللي عندو بيت من حجر
أبو زيد خالو، بس هم بحبوش ولا برتاحوش
غير ببيوت الشعر. بكون مفروشك بهالجعدان^١
والبسط لمزبطة، والسبع يستي جدعان^٢،
كاومو اليهود وصارت معهم معارك طحن،
وكتلو منهم شهدا كثير وهم كمان كتلو يهود.
تعدش، طول عمرهم فرسان وبكنو ل سلاح من زمان زمان...
وهي قصة السبع يستي..
انديكش حالك اليوم إنت سامحت..
بكرة بتلكيها وبتتسامح عند الله..
وعند عبيدو المال معوض يستي المهم الصحة.

١ صوف الخراف

٢ أبطال



قرية عاقر^١

- أيش أخبار صاحبك هضاك يستي؟
إلي تزوج وثاني يوم أخذوه اليهود؟

- والله يستي انحكم عشر مؤبدات...
إيش فكرك فيه؟ صارلو محبوس تلاتعشر^٢ سنة.
وقبل شهر هربولو أهلو من السجن نطفة..
ليزرعها برحم مرتو، وما زبط...

- ليش ما زبط؟ لتكون مرتو عاكر؟

- إيش عاكر هذي يستي؟

١ عاقر قرية ناحية الرملة (لواء غزة)، وعدد سكانها ١٦١ نسمة

٢ ١٣ سنة

- يعني بتخلفش ولك.

- أها قصدك عاقر؟

- أيوه هيه هذي.. على نبي الله زكريا
وعلى نبينا السلام.. كانت مرتو عاكر..
وربنا فش إشي عليه بعيد.. وحملت بسيدنا يحيى.
تخفش يستي المرة الجاية بتزبط إن شاء الله.
ذكرتني إبلدة عاكر!

كانو يكولو نبي الله زكريا، وستنا مريم،
عليهم وعلى نبينا السلام، كانوا ساكنين فيها،
كبل متروح على بيت لحم، وسموها بهالإسم
لأنو كان سيدنا زكريا ساكن فيها..
ولمنو كانت مرتو عاكر.. وحملت..
وربنا أعطاهم يحيى.. صارت الناس تכול
عن هالبلدة عاكر.. تسموها بهالإسم.
أهل عاكر يستي من أحسن وأطيب الناس.

- والله يستي أول مرة أسمع بهالمعلومة.
يعني لهيك سموها عاقر؟
إلي صحاب كثير من عاقر،
العواقري وموسى وغيرهم.
عوايل عاقر كثار يستي؟

- والله يستي معرفتي فيهم خفيفة أنا.

- مين بتعرفي منهم؟

- عندك صيدم والنمله وموسى، زي مكلت،
وأبو حسين والعجوري والشلطي وأبو غزال
والأطرش والرحال وجبر والجرجاوي ومطر
ودامير والعور وبكر وشكفة وأبو رحمية
والنجار ومسلم وسويلم وسلامة ونجم
وزيادة وغنيم وخليفة والكروم وأبو ليلى
وأبو مشايخ والفتل والعيسوي وأبو شلشل
والخالدي والباز وعوض وأبو الزمر وبنور
وهلال وجودة وغانم ونصرة وعلانة وعليان
وأبو عمر وكرمش وإسدودي والفيوم وعمران
ورمضان وعمر والشاعر وأبو حجاج وحمدان
وإكليم وحماد والفار والجابرية وأبو خيط وعطية
والغول والبشيتي والزناقي وأبوشرف والعمواسي
والمصري وشمس والعشيري وعبدہ وبكير والريفي
والعواكري إلی کلت عنهم،
استنا أذكر لك خاف الله في كمان..

صحيح.. ودريس والجمل وأبو غزال ودامير ومالعور وعشري
كاسم ونصر وأبو عليا وأبو دلال والرحال والخليفة وعيسى
والبسيوني وكفاية والصيداوي وعبد الكادر وحنفي وشادرم
والدريني وأبو السيد ونصر والسعداوي والصعدي
والغمري وعبدہ وأبو نار وكسوحه والبابلي
وصويلح والكرنب وأبو سعد..
هَی إلی بعرفهم یستی من أهل عاکر..

والبكين ميعتبوش علينا.
بلدة عاكر كانو يكلوا عنها لمزركشة،
من كثر هالخير والخضرة والشجر إالي فيها.
وأهلها فلاحين تبعين زراعة وكلاعة..
كروم عنب وفواكه من كلشي،
إيش بتشتهي نفسك، بلاد يستي دشرناها،
وهاجرنا، الله يكو دلهم اليهود، أخذوها عالمستريح...
وعاكر يستي بلاد آل عمران إالي مكتوبين بالكران.
ستنا حنا أمها لستنا مريم، عليها وعلى
ابنها عيسى السلام، وحنا هذي جوزها عمران
بحالو تنهم دار عمران بكربولهم العوكرية..
تنها حملت بسيدنا عيسى، عليه
وعلى نبينا السلام، كلها ربنا شوفيلك
مكان شرك بلدتك، والله زي مكلها بالكران.
كامت شافت بيت لحم. مهّي بيت لحم
بتيجي شرك عاكر يستي..
وكبل لتصل بيت لحم من شركة،
بدكاش غيرش^١ تمر من المنصورة،
وظلك مشرك، متعوجش لا يمين ولا شمال،
تنك تمر من خلدة، وتنك تنزل بوادي لصرار،
ومنو لرفات، ومن رفات بعدها بتيجي عمشيتك
عرطوف، ومن عرطوف دير أبان وغاد
وبيت عطاب وعكور بتكون عشمالك يمك،
وأنت مشرك تنك تصل بيت جالا ما بتلاكي

حالك لئك يمك إبيت لحم.
ومن عاكر وشمال يستي رخوبت
وبعدها الرملة، ومنها وغربة
يمك علطول لئك فيها بلدنا زرنوكة،
ومنها وكيلة جنوب زي مبتكولو لمغار وكطرة،
جيران إحنا وعاكر يستي، جيرانا هم من شرك
بلدنا زرنوكة، جيران الهنا.
وعاكر يستي بيوتها بيض من لبنت الطين
والكش ولشمينتو مصفوفات صف،
انطول، نطول، وهي أربع مناطق..
ولّا هنة أربع حارات: البلدة القديمة
وثكنة الشمال والحارة الشرقية
ومنطقة كانو يكتولولها العمارة
غرب البلد، منها بتروح على طريق يافا
ومنها بتنزل نحيث غزة جاي.
وكان بعاكر يستي مكامين.. والله ما بعرفهن
لمين.. وجامعين.. ومدرستين.. وصحية.
غير عن بكيت البلدات عاكر، كديمة
ومتقدمة عنا. كانت وفيها عواميد رخام، يبي كديش..
ولمنهم هجروهم اليهود، زي عملتنا، وعملت بكيت لبلاد،
هجوا نحيث المسمية لكبيرة، وعكطرة،
تنهم إجو جاي على غزة.
وكد مفيهم كاومو على كد مكدرو..
كان فيهم فدائية بنشد فيهم الظهر..
إلي ستشهد، وإلي نفذ بحالو ودشر مالو

ومحتاجاتهم^١. العوكرية جدعان، ومناح.
الله يسيهم بالخير مطرح مهمه.



قرى السوافير^١

- وين يستي مبارح توخرت^٢ تنك روحك؟
سمعتك بتطبك الباب بنصل الليل!

- والله يستي كنت بمربوعة^٣
بالمخيم، عند البحصه^٤.

صاحب بعز علينا، وقمنا بالواجب.

ستي هذول لخمولي راسي!

هي السوافير فيها شرقية وشمالية ؟

ولأ سوافير وحدة؟ ولأ هنه أكم قرية؟

١ هي اسم لثلاث قرى فلسطينية: السوافير الشرقي، والسوافير الغربي، والسوافير الشمالي.

تقع جميعها على بعد ٦ كم إلى الجنوب الشرقي من إسدود، ذكرها الرومان باسم شافير

٢ تأخرت

٣ طريقة دبكة ورقصة فلسطينية للبادية

٤ عائلة البحيصي

عيلة البحيصي سوافير، ورباح سوافير،
وإسماعيل سوافير، ولباز سوافير!
هي أكم سوافير فيه بالبلاد؟
وكل واحد بقلي سوافير شكل..
إلي بقلي إحنا غربية، وإلي بقلي إحنا شمالية،
وإلي بقلي إحنا شرقية...

- والله يستي غشيم أنت!
هنة ثلاث سوافير.. عملات زي لمثلث..
سوافير شركية وغربية وشمالية.
الشركية كنلها وادي، خاف الله إسمو كريكع،
وكنتلك كلها عنب ومشمش وتين
وشويت خشخاش على لحفاف'.
وكانوا ياكلوا عنها سوافير العمصي،
بيجي خمسة وعشرين دار عمصي فيها.
وحارة العمصي فيها بير الكرية وجامعها.
والسوافير الغربية كانت لجاي كرية على غزة،
كانوا يروحوا منها على يافا.
يكلوا طريك يافا همرك منها
وكان أبوي يكل أنهم زينة،
بيوتهم لبنة طين مفهاش حجر.
والسوافير الشمالية لغاد نحيث سدود ولرملة.
وكان لكل كرية في جامع، والهن كلهن مدرسة.
السوافير يستي بتوهش حوليها كرى كثيرة..

بيت دراس وعبدس وجولس وبيت عفا وتل الترمس
والجلدية وجسير وكرتيا وحتا والكسطينة.
أكثر أهل السوافير إالي هاجرو
جاي من عائلة البحيصي وإسماعيل
ولباز وأبو لبدة ودبور وأبو شقرة،
ولها بيحي ستة وستين عيلة.

- بس يستي همه البحصه مش بدو،
ليش بعملو دحية ومربوعة؟
ومحترفين فيها.. والله يعني شاطرين زي البدو!!

- مهو يستي كان سيدك أبو حسن يكل
همه أهل همة وكرم السوافير،
وأهل شغل ومشغلة بالزراعة،
وبتربية المواشي ومتأثرين كثير بالعرب.
كان يكل إنو فيهم ناس من العيل،
يعني جايين من سينا،
أبو عودة وأبو لبدة وأبو لطفية وأبو ليلي
وأبو مسعود، هذول عوايل جيين من سينا يستي،
بعرفوش بفراحمهم غيرش الدحية والمربوعة،
تأثرو فيهم وتعلموا منهم.

- وايش جابهم من سينا للسوافير يستي هذي العائلات؟

- أنا عارفة يستي كانوا يكلوا
في واحد باشا إسمو إبراهيم باشا'
عمل حملة بمصر وصار يطرد الناس
ويطفشهم، تاجو جاي عبلادنا
تشاردين من السخرة والضرايب وفحر الترع.
وكانو يكلو بجندوهم وموتو جوعانين.
شردت الناس، كانت بلادنا خصبة للزراعة
وأمنية وفش فيها حروب..
واسعة وبتشرح الكلب..
وهادي قصة السوافير يستي...
كوم من وشي بدي أروح أسكي البطات.

١ إبراهيم باشا بن محمد علي باشا بن إبراهيم آغا، الابن الأكبر لوالي مصر محمد علي باشا



قرى صرفند العمار - والخراب^١

- ستي خذلي هالعشرين دينار صرفلي
إياها من عند محمد عطية.

- ليش بدك تصرفي دينار يستي؟
هاذي يبِّي مَقْدَمَهَا.. من تحت البلاطة مبينة...

- سلامة خيرك يستي

١ - الصرفند هي قرية فلسطينية مهجرة تقع إلى الجنوب من مدينة حيفا

معنديش بلاطة والحمد لله..
ونت جاي هتلي معك وكية جوز ،
ونكيلى رطل باذنجان مكرمط وزغير،
بدي أعمللي حبت مكدوس.
كديش طلعت العشرين؟

- طلعت مية وعشرة شيكل يستي.

- مالو الدينار رخصان؟
والله بذكر كانت توصل
مليون وثلاثميت ألف!
هو فش غيرو صراف عملة..
هاض محمد عطية؟

- يبيّ مكثرهم يستي!
بس أنا بصرفش غيرش من عندو.

- ساك الله عيَّام زمان كانوا يكلولوا
صرفند العمار.. كاينة زمان
بلدة لصرافة والصرافين.. صرفند العمار...

- والله مليح إليلي جبتي السيرة يستي!
هي صرفند أكم قرية؟
قرية وحدة ولّا ثنتين؟
في إلي أصحاب صرفند الخراب..

أول مرة أسمع صرفند العمار!

- منت غشيم يستي

غيرلي الخمسمية ألف هذي مكروطة'
وأنا أكصلك قصة صرفند العمار والخراب.

- هاتي يستي، هي وحدة جديدة، تكرم عينك

- إسمع يستي أول إشي صرفند العمار...

مش كتار عويلهم، كليلة،

عندك: أبو معمر وحماد وعبد العال

والنمروطي وبرهم وبرهومة وعمارة

وسند ودرسد والهيلي وعثمان

وزعبوط والنجار ونوفل وعويضة

والغول وخريبة وظرخان وأبو جزر

وعبد الرحيم ومصري والنوش والحج

وجانم وأبو خضر والطار وأبو السعود.

استنا تذكرلك، الله ميعيني على الزلال،

بلاش أخريط..

وأبو حميد وأبو السنديان وأبو طوق

وجحيش وحنفي والحضري ودريع.

ويش كمان بينت يجازية..

والدويك ونجم ورمضان وشلايل والكدش

وصافية والصيصان والكللاوي وأبو سرحان

والهندي وكويدر ونصر الله والنمس وحمودة.
كديش طلعن هدول؟ إنو فيهم صاحبك؟

- والله كثير طلعو صحابي يستي..
بس إلي لخبطني أبو معمر...

- أيوه هو صرفند العمار.

- طيب و صرفند الخراب
إيش قصتها؟

- كبل الخراب لازم تعرف يستي
صرفند العمار كان اسمها صرفند الكبيرة.
وكانت مطورة أكثر، ومتقدمة أكثر،
من العمار، وفيها السوك
وفيها الجامع الكبير زيها زي تكول
هي المدينة ل صرفند الخراب.
هديك سموها خراب لأنو فش فيها حركة
زي صرفند العمار الكبيرة.

بعدينش يا ستي هذول لنكليز
الله يوطرجلهم^١ هم إلي خربوها.
زمان زمان مسوين فيها مذبحه،
وكتلين أهلها، وهدمينلهم السوك،
وبيوتهم لنهم غيورين أهل خراب،

١ يوطي رجلهم إلى الأسفل ولا تقوم لهم قائمة

كايين كتلنلهم أكم من عسكري نكليزي..
لهيك سموها الخراب.
كانوا العسكر لنكليز يركو مخمورين
وسكرانين من الكرية، تنهم متفكين أزالام البلدة
يعلكو جراس تبعوت الدواب
وتنهم ييجو العساكر يدكو لجراس
ويمرطوهم^١ كل بدن ولا أخوه.
ها يستي ناس بتغار وبتخاف على عرضها وأرضها.
بس ناسها الخراب فلاحين وفش أحسن منهم،
ولا أطيب منهم وعويلهم فخاد وبتفرع منها ناس.
إلي بتفرع منها فخدة وإلي تنتين وإلي ثلاث:
إبراهيم وأبو رزك والأسعد والعطار
والعويني والعيسوي والفكعاوي والكيم
وحمدان ودكدوكة وعمارة وعنبر ومطر..
والله يستي هي إلي عرفاهم.
أنا من صرفندية الخراب معلوماتي كليله عنهم..
وصرفندية العمار زي عملتهم فخاد فخاد.
وصرفند الخراب هاض اسم بشرف
أهلها يستي لأنهم ثوار وكاتلو الانكليز الملاعين.
هي كان اسمها صرفند الغربية..
وهديك كانت اسمها صرفند الشرقية..
مش تكول خراب يعني إشي بحر
ولا إنو مش حلو، لا يستي، هاض إشي بشرف.
والله همه أول ناس تبهذلو وهاجرو كبلنا كلنا.

وزرعاتهم موز وبرتكان وحمضيات
وشوية خضرة، خصبة أرض الصرفندية.
وبيوتهم إشي لبنة طين وكش،
وإشي شمينتو وحجر.
كل واحد وعهوا كرشاتو.
وتنهم هجّروهم اليهود زي عملتنا يمك
عاد همه أهل مكاومة وعندهم خبرة
من أيام لنكليز، كانن حولين صرفند
ثلاث كوبنيات يهود^١..
هلكوهم هلك الصرفندية...
وبعدينش إيش بدهم يعملوا؟؟؟
إيد لحالها بتصكفش يستي...
إلي منهم إجو جاي على غزة..
وبتلكيهم بالاردن.. وبالضفة...
وتشتت الناس، الناس هاجرت مرة..
الصرفندية مرتين...
وكنلهم مدرسة بنات وولاد بكل بلدة،
مدرستين وجامع.
وبتوهش صرفند يستي،
منها وشمال لغربة شوية
بتيجي بيت دجن، ومنها وشركة يمك
على طول اللد، ومنها وكبله بير سالم
وبكيت الرملة، ومنها وغربة كبل البحر
عيون كارة.

وهاي هي قصة صرفند
العمار والخراب يستي.
خطرة خرفنا أبوي خريفة
بتفرط من الضحك. كال جاي
واحد صرفندي بيع بطيخ على رأس البلدة
من صرفند الخراب، مرك عنو واحد
كلو بدي أشتري بطيخة، كلو إشتري
ومين ماسكك. كعد الزلمة يخبط على البطيخ..
كام كسر بطيخة. الصرفندية عصيين،
كلو: شو إالي عملتو؟
كلو: انكسرت شو أعملك؟
بدي أعطيك حكه.ا
كلو: يعني إنت جاي توزع علينا مصاري؟
بديش حكها بدك ترشها زي الله ما رشبك.
وصارتلك هوشة ما حلها غير مختار.
وهي صرفند وكصتها
هم مثل ما خرفتك بحكوا بتشتشه.



المخيم

- ستي والله إلكِ زمان ما حكيتيلي حكاية!!
شو الدعوة؟

- ولك يا مفتري صرت حكيالك
بيجي أثنين وثلاثين حكاية...
بدهن وحدة ويصيرن كد حبات السبحة!!
أنت بتشبعش حكاوي!!

- خلص يستي آخر وحدة.
وبعد هيك راح أنشغل
بكتابة قصص جديدة عن المخيم،
وعن الشغلات إيلي كانت تصير

في الانتفاضة القديمة،
تبعث السبعة وثمانين.

- وعاد بدك تكتب عن أنو مخيم فيهن؟
منت نولدت بمخيم الشابورة برفح..
ولمنو صار بالشابورة مواجهاات..
جابتك أمك عندي على مخيم دير البلح
وأنت بالإعدادية.

- بدي أكتب عن كل المخيمات..
حتى المخيمات إيلي بالشتات، إن شاء الله.

- غلباوي كنت، كل يوم وأنت عملي مشكلة
وضربلك حد من ولاد الجيران.
كال أمك مشرداك من اليهود!!
ولمنهم ييجو اليهود كل لولاد بشردوا..
غيرش إنت.. بتعملي فيها أبو الهمايم'
وأخر واحد بتشرد...

- ستي إحكي لي عن المخيم..
وعن حياتكم فيه، كيف كانت؟

- إيش بدي أحكيك تحكيك يستي!!!
والله المخيم كنا عيلة وحدة

إنت ناسي لمني كنت أبعثك
توزع صحن الطبخ، بيحي على سيع دور،
والصحن إالي يرجع معك ميرجعش فاضي؟
يرجع مليون، كنا زي متكول،
بنحب بعض.. وبنواسي بعض.. وديرين بالننا
على بعض.. لبواب مكنتش تتسكر يستي...
والله كنا أنا وأم ماجد البحيصي
وأم عبد الله زكوت وبنات المختار مغاري
وأم الشاي وأم البدوي وأم رائد لبحيصي
وأم عصام بدوان وأم خالد لشعافي وأم عصام لبحيصي
وأم عصام تايه وأم رائد لبحيصي وأم أحمد كساب
وأم خالد صالحة وأم مجدي الخالدي وأم منير عماد
متكولي إلا خواتي، إالي عندها مفتول ولا بتعمللها
بحبت كعك، تلاكي معها ميت إيد وإيد.
ولا بالفرح والكره.. كلنا وكفين جنب بعض...
الكراب لبعاد ييجو يعزو الجيران لكراب بالعزيات،
وبالأفراح الكريب لبعيد يهني الجار لكراب.
زي اليوم! محدش سائل بحد، صرنا زي الخوجات
ولا كود يكدر الخواجة يوخذ ولد من الحارة؟
بتلاكي للولد ميت أم وأم، بتخطو بحضنها
وبتكول للخواجة هاض إيني.
مره الخواجة كال لستك أم ماجد:
إنتي يخجة كل ولاد المخيم ولأدك؟
كل ممسكنا ولد بتكولي إيني!
كلتلو: آه كلهم ولادي...

ولّا بمنع التجول تنو كان يطول
كانو الدروية ولبروك المزارعين، الله يخلف عليهم،
يكطفو من هالحمات لخيار والبندورة وهالكوسة والباذنجان
ويعطوهن للشباب ويوزعوا..
كانت تصلنا الخصرة لباب الدار...
على الدور من تحت لتحت.
اليهود بطوكون^١ لحتى منعرفش نوكل ونتسوك..
والشيخ جمال مغاري وأبوه، الله يرحمو،
كان عندو ديوان، كود في قصة ولّا مشكلة
بين حد، تكعد يومين، يك بمطرحها تخلص
من غير شرطة ولا محاكم ولا سخام بين...
الناس بتمون لبعض كانت، وبتسامح
وبتسقط يستي، ودي الكرش بالمسامحة
برد برجع كرشين، وليّ همون للناس
الناس بتمونلو.
ولا كان فيه غراب بين زي اليوم، حبوب ومخدرات...
كان ملثم أبو بلطة وجنزير
مخوف كل لمسكعين والدشر..
لا شرطة ولا عساكر، كانوا لمسكعين والدشر
يحسبو لبو بلطة ميت حساب.
إيش بدي أحكيلك عن المخيم يستي؟
المخيم طلع أبطال، إسماعيل أبو جياب، الله يرحم روحه،
ومحمد عرفات لكرع، وفؤاد تماراز وأيمن نصار،
هذول شهدا طخوهم اليهود.

١ يمنعون التجول وحركة المدنيين في الشوارع

وبلكي كنا نعرف مين فتح ومين حماس؟
مكنش الخراف الفاضي هاض..
كنا كلنا أهل وبنحب بعض وبنخاف على بعض.
المخيم مطلعش على كد الشهدا يستي!
طلع دكاترة ومهندسين وأساتزة
وشباب بتبيض الوش.
إلي كان ينحبسلها ابن كانوا ولاد المخيم
كلهم يصيروا ولادها.
كود تلاكي مرا ماشية بالشارع وحاملة عراسها، بكيت
يفط ميت شب يحمل عنها ويوصلها للدار.
والله منا عارف إيش جراننا يستي؟
تصرنا نعادي بعض..
هذي لمعاداة بكطع إيدي إذا مورهاش اليهود...

انتهت السلسلة الأولى من حكاوي ستي بعدد حبات السبحة، أعتذر لجميع
الأهل الذين لم تذكر بلداتهم الأصلية في هذه السلسلة، ومثلما أني لا أنسى قضيتي
الفلسطينية وحق العودة، كما أني لن أنسى أهلي من البلدات التي لم أأتي على
ذكرها، ولنا عودة في السلسلة الثانية لأحاول ذكر ما أستطيع من بقيت البلدات
مع كل الحب.

نبيل العريني، بلدة زرنوقة

مصادر الكاتب



على لسان الحاجة سليمة المياتي، قرية قلنسوة



على لسان الحاجة خضرة قشطة، بلدة زرنوقة



على لسان الحاجة جازية ابو شاربين، بلدة زرنوقة

كتاب عارف العارف تاريخ بئر السبع وقبائلها، ١٩٣٤.
بعض مخاتير وكبار السن من البلدات الأخرى.

أراء القراء

لندن

دمشق

بيت لحم

